

KA
NGUH
'LEI
SHYLLONG
&
LEH NIAM
IEWDUH



KA NGUH 'LEI SHYLLONG

&

LEHNIAM İEWDUH

Acc. No. 1301/EK,1

Class No. _____ Book No. _____

Author LALOO DONBOK .T.

Title KA NGUH LEI SHYLLONG DAB
LEH NIAM IENDUH

Acc. No. 1301/EK,1

DISTRICT LIBRARY
GOVERNMENT OF MEGHALAYA
EAST KHASI HILLS

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.*

Help to keep this book fresh & clean

© Copy Right Reserved da Ka Dorbar u Syiem ka Hima Myllem.
Sien Shon ba nyngkong 10,000 copies.

Printed at Ri Khasi Offset Printers, Umsohsun, Shillong.

Laborious Manik S. Syiem
Syiem of Myllichem


"NA KUT SHADEM"

Kum u Syiem u Kmie, nga dap da ka jingsarong, ba dang don pleng ha kum kane ka juk kaba mynta, u Khraw-mynsiem napdeng ki Rangkinsai ki Rangdajied - u Bah Donbok T. Laloo uba la kloï ban buh teng ÿa la ki kam ba kyrkieh la jong bad ban kynrup shuwa bad aiti ÿa la ka jong ka deiti kaba u Syiem u Kmie bad Ka Dorbar U Syiem Ka Hima Myllichem ki la pynkhamti bad pynkit ha u ba un pynlum, pynlang, pynthoh bad pynbuh ryntih lem ha ka dur jong kane ka kot - "KA NGUH 'LEI SHYLLONG BAD LEH NIAM ÌEWDUH".

Ka jingwad shitom jong u Bah Donbok T. Laloo ban lum ban lang bad buh noh ha ka jingthoh shaphang ki **Mawbynna**, U **Shulong** bad **Ka Ìewduh** ka long ka jingai-ei kaba khraw, ym tang ÿa ka Dorbar U Syiem Ka Hima Myllichem hynrei ruh ÿa ki Khun ki Hajar pateng la pateng ba kin kham tip bha ÿa ka **saiñ pyrkhat** u Mynnor.

Nga kyntu ruh ÿa kiwei de ki Khraw-pyrikhat ki Khraw-jabieng: khie joit ! ÿeng rangbah, ÿa thoud ÿatih bad ÿa-buh noh ha ka jingthoh bashai kdar ÿa ka **saiñ pyrkhat** ba jylliew jong u Longshuwa, kaba long tang ma ka u thied u tynrai katkum ka Hok ka Riti, ka Riti ka Dustur jong u Hynñiewtrep u Hynñiew-pangsngait, khnang ban nym iehnoh shadien ÿa kane ka spah-bah bad ban dang leit lyngkhuit sha kawei pat ka pateng, hynrei ban rah bad ban sam pat sha ki khun ki pyrsa jong phi pateng la pateng. **Kane ka dei ka Deiti ka jong nga bad ka jong phi.**

To, Bah Donbok T. Laloo nang ÿai kiew artet ha ka nam ka burom, nang khiah-kiat khiah-stang, nangbit nangbiang, nangphuh nang-phieng ha ryngkat ka synran ka synrop, ka da ka ker bad ka kyrkhu ka kyrdoth U Trai Nongthaw Nongbuh najrong ha tbian.



L.S. Syiem
Syiem of Myllichem
Myllichem Syiemship

*Dated Mawkhaw, Shillong
the 17th September, '93*

NGA SNGEW NGUH

Nyngkong nyngshap, nga pynpaw ia ka jingsngew nguh ia u Syiem ka Hima Mylliem bad ka Dorbar ba ki la shon ia kane ka kot na ka bynta ka jingbha jong ka jaitbynriew u Hynñiewtrep, Hynñiewskum, u Hynñiew pansngiat Hynñiew Hima. Bad khnang ban da ia shai, nga kwah ban da jer ia ka kyrteng bad ka kur jong ki.

1. Paiem Laborious Manik S.Syiem, Syiem ka Hima Mylliem.
2. Charles Marbaniang, Lyngdoh Raid Mylliem.
3. Charle Stone Sohtun, Lyngskor Sohtun.
4. Adningwell. Myntri Nongkhlaw.
5. Hobing Jun, Myntri Kharkongngor.
6. Heros, Myntri Synteng Nongdhar.
7. Broison, Myntri Synteng Umwi.
8. Druilington, Myntri Wartynghah.
9. Kedres, Myntri Kharrubon.
10. Hied, Myntri War Nongjri.
11. Dastarly, Myntri Kharmawphlang.
12. Ngei, Myntri Kharmon.
13. Sanial Roy, Myntri Mylliem Umlong.
14. Jarmanik, Myntri Lyngdoh Nongbet.
15. Harrington, Myntri Iawiang.
16. Denik, Myntri Khyriem.
17. R. Endringson, Myntri Khar-ir.
18. Ispin, Myntri Pyrtuh Nongbsap.
19. Kwet, Myntri Shanpru.
20. Piekshon, Myntri Pathaw Lariew.
21. Dorbar, Myntri Syndor.
22. Dwiakshon Myntri Kharsati.
23. Robert Feller, Myntri Kharbuki.
24. Mohendro, Myntri Rapsang.

- 25.Emington, Myntri Labnang.
26. Shrong, Myntri Kur War Sadew.
27. Kennedy Stodar Lyngstieh.

Para kur para kha, ki lok ki jor bad kiba ieit ba thoiñ, lehse phi kwah hi ban tip kumno nga poi kynmaw ban thoh ia kane ka '*Leh Niam Jong Ka Raid, Myllem.*' Sngap ngan iathuh. Dei u Paiem Laborious Manik S. Syiem uba iai ong ia nga ba nga dei ban thoh ia ka '*Leh Niam Yewduh.*' U da pynpaw ba u thrang eh hir hir ba kane ka kot ka dei ban paw pyrthei mynta hi u snem, la kumno kumno ha ka sngi Leh Niam iewduh khnang ba ki khun ki hajar bad ki khun samla ka Ri kin tip.

Nga sngew ia hap jingmut bad ka jingangnud ba sngur mynsiem jong u Syiem, namar bun na ngi ngim pat da sngew tuh shai shaphang ka Leh niam iewduh, hynrei nga jngan hi tiaw ban kular ba lyngkot eh ka por. Khatduh, nga leit sha u Syiem bad ha khmat ka Dorbar nga ong.

"Paiem, ngan hap ban sangeh noh shwa ia ki jingthoh ba nga la sdang shaphang ka Raid Nongtluiñ, Raid Nongkharai bad kiwei. Ieh ngan thoh shwa noh ia ka Leh niam iewduh kumba phi la angnud eh. Ngan ym shim bainong na ka bynta kane, hynrei ka Hima ka dei ban pynmih ia ka. Lada don jingioh nong eiei na ka kot, ai kan mat ioh ka Hima."

U Syiem bad ka Dorbar ki kubur da ka jingkmien bad khnang ban iaid kloi ka kam, la ia buh sngi ban ia sdang noh naduh ka 8 tarik u Jylliew 1993. Kumta ha ka sngi 8 tarik bad 10 tarik u Jylliew ngi la ia shong dorbar ha thanad khlieh iewduh ban ia pur ia lir ia ka kam. Ki Myntri ba la ia don lang ha kitei ki ar sngi ki long, u Bah Piekshon Pathaw Lariew, u Bah Robert Feller Kharbuki, u Bah Heros Synteng Nongdhar, u Bah Shrong Kur War Sadew, u Bah Hobing Jun Kharkongngor, u Bah Dastarly Kharmawphlang, u Bah Ngei Kharmon, u Bah Broison Synteng Umwi, u Bah Kedres Kharrubon, u Bah Denik Khyriem, u Lyngskor Charle Stone Sohtun bad u Bah Charles

Marbaniang, uba long u Lyngdoh Raid Mylliem.

Ka kam ka sdang tyllun stet bad nga la ioh ki jingbatai kiba bniah, kiba shai bad kiba sngew tynnad na kitei ki Bakhraw ka Hima. U Myntri Ngei Kharmon u la ai ha nga ia ki kyntien duwai phirat kiba u Nongkñia u kynih u phawar ha ki por leh niam. U Myntri Ngei u long uwei na ki nongkñia kiba stad katta katta. U la pynkoit bun spah ngut ki nongpang. U long nongkñia la palat laiphew san snem bad ha ka leh niam İewduh u la iarap kumba hynñiew snem lynter. U dei u khun jong u Shiran Lyngdoh. Mynta u Myntri Ngei u la don kumba hynriew phew lai snem ka rta. U long u Myntri uba shlur bad uba ieit hok ia la ka niam ka rukom. La don ka sien ba ki bor khyllah ki khang ban leh niam İewduh, u Myntri Ngei um patiw, u ai mynsiem bad pynshlur ia ki San kur Khatwei kur da kaba ong kumne:-

“ Ban ia kaba duh ka niam u San kur Khatwei kur, lah kaba shong phatok. İeng San kur Khatwei kur ioh duh ka niam..”Bad ki pynlong ia ka leh niam İewduh khlem pynbna paidbah. Ki bor khyllah kim bna eiei ia ka buit ki San kur Khatwei kur tad haduh ba sawa kynsan ka bom ka ksing mastieh niam bad kita ki bor khyllah kim shym nud ban pynsangeh ha shiteng ka jingleh niam. Kumta naduh kata ka por, ym shym don shuh ki ban nud mushlia ia ka leh niam İewduh ha İewduh Shillong.

U Bah Charles Marbaniang pat, u la iarap ban pynioh ar sla ka jingthoh na u Bah. D. Nongkhlaw. Ka jingthoh kaba ia dei bad ka leh niam Mawnarian bad Lum Shyllong ia kaba la lum bad thoh da u Kesswell Lyngdoh (Bam kwai ha dwar u Blei). Nalor kata, u la trei shitom khui ban lum ia ki dur ba ia dei bad ka Leh niam Raid Mylliem kiba ngi la shon ha kane ka kot. İa u Bah Charles Marbaniang, la jied Lyngdoh Raid ha ka 6 tarik u Kyllalyngkot 1990 bad la ai sanad ha ka 21 tarik u Lber 1990. U dei u para trai jong u Kesswell Lyngdoh. La u Bah Charles u long Lyngdoh dang khyndiat snem, pynban u la tip bha ia ka niam ka rukom, namar u la ju synran bad

ia syllok bha bad u Kesswell Lyngdoh uba bat ia ka kam Lyngdoh Raid haduh kumba 7 snem eiei.

Ynda la biang ka lum jingtip, nga la sdang ban thoh. Ia ka leh niam ha Iewduh, nga la iohi da la ki jong ki khmat ar sien. Shisien ha ka 15 tarik u Nohprah 1991 bad shisien pat ha ka 9 tarik u Nohprah 1992. Kumta kum ban shu ong noh, la kham suk ban thoh. Hynrei ia ka leh niam Mawnarian bad Lum Shyllong ngam pat ju iohi. Kumno re kumno, nga poi iapur khana ha u Bah B. Nishan Wahlang ba nga sngew shitom jingmut ban thoh ia kaba ngam shym iohi da la ki jong ki khmat, khamtam kat ia ka niam. Hangta u Bah. B. Nishan Wahlang u wiat muiñ bad u iathuh ba u don ka phlim Video ba ki la ring ha ka por ba leh niam ha Mawnarian bad Lum Shyllong.

Thik kumba phah da u Blei, nga pyrkhat ha la mynsiem. Kumta ha ka step 28 tarik u Jylliew '93, nga leit sha iing jong u Bah B. Nishan Wahlang ban peit ia ka phlim. U Bah Raphael Warjri u iarap lang ban pyniaid beit ia ka phlim. Hangta kumba weng lut phoiñ ia u lyoh ba kah dum bad nga la ioh lad ban thoh kham bha khlem don shuh ka artatien. U Bah B. Nishan Wahlang u la long u secretary jong u Syiem ka Hima Myllem bad ka Dorbar hynriew bnai ha u snem 1986. Nangta u la shimti biang ia ka kam Secretary ha u snem 1988 bad neh haduh mynta.

Da ka jingiatrei lang, nga la lah ban pyndep ia ka jingthoh ha ka 12 tarik u Naitung '93 bad khnang ban ia hun lang, ha ka 16/7/93 bad 21/7/93 nga la pule ia ka manuscript ha khmat u Syiem bad ka Dorbar u Syiem ka Hima Myllem ha kaba u Bah B. Nishan Wahlang u la ia don ryngkat. Ka Dorbar ka la pdiang ia ka jingthoh kumba ka long bad ka ai jingmut ruh ban pynbeit hangne hangtai. Kumta nga la ai ia ki manuscript ha u Charles Lyngdoh, ha u Lyngskor Charle Stone Sohtun bad ha u Bah B. Nishan Wahlang ba kin nang ia peit bniah shuh shuh ha shwa ba ngan phah shon ia ka.

Lada nga la lah ban pyndep thoh ia kane ka kot tang hapoh sawphew sngi, ka burom bad jingsngew nguh ka long ia kitei ki rangbah ba nga la jer kyr teng. Kumjuh nga ai ka khublei sngew nguh ia u Paiem Laborious Manik S.Syiem, Syiem ka Hima Mylliem, ba u la ai bad shah ia nga ban shon ia kane ka map kaba phi shem ha kane ka kot. Nga ai khublei ruh ia i Kong Rita Ros Marbaniang iba long ka Lyngdoh-sad bad ia i kong Jopmon Nongkhlaw, i kmie ki khun jong u Kesswell Lyngdoh na ka bynta ki dur bad ka mynsiem ba sbun jong ki. Shwa ban pyngkut, nga kit bok kit rwiang ia phi kiba pule ia kane ka kot bad nga kyrpad ba phin sngewbha ban ia ai jingmut lem kumno ban nang pynbha shuh shuh ia ka.


Khublei shibun

Lummawbah,
Upper Shillong
5 tarik, Nailar 1993.

Donbok T. Laloo



**Paiem Laborious Manik S. Syiem,
Syiem ka Hima Myllem**




U Syiem bad ki Myntri ka Hima Myllicm

Na ka diang sha kamon

Kiba teng : Broison Synteng Umwi, Harrington Iawiang, Shrong Kurwar Sadew, Ngei Kharmon, Jarmanik Lyngdoh Nongbet, Dastarly Kharmawphiang, Kennedy Stodar Lyngstieh.


Kiba shong : Denik Khyriem, Dwiakshon Kharsati, Heid War Nongjri, Charle Stone Sohtun, Laborious Manik S. Syiem, Charles Marbaniang, Hobing Jun Kharkongngor, Heros Synteng Nongdhar, Kedres Kharrubon.



Mohendro Rapsang




Druilington Wartynghah



Ispin Pyrtuh Nongbsap




Robert Feller Kharbuki



Piekshon Pathaw Lariew

SHI KYNTIEN KWAI

Ha ka sngi Umni, 16 tarik u 'nai Tung, 1993 kumba la iakut khnang la wan poi u Rangbah Donbok T. Laloo ha ling Dorbar U Syiem ka Hima Mylliem, ha Mawkharr, Shillong, ha kaba U Syiem Hima, u Lyngdoh Raid Mylliem, ki Myntri bad manga ruh ngi iadon ryngkat lang. U Rangbah Donbok T. Laloo ula wan khnang ban pule ia ka jingthoh jong u ia kane ka kot naduh



B. Nishan Wahlang

basdang haduh ba kut, bad ban ia phylliew jingmut halor ki jingthoh jong u ba ioh dang don shuh kaba dei ban pyndap lane ioh don kaba dei ruh ban dkhat noh, lait noh katto katne ki bynta kiba dang dei shuh ban bsut ia kiba ki Myntri ki la ia pynkynmaw lem bad ba u Bah Donbok ruh ula pyndap pynbiang, bad wan pule biang ha ka sngi Rynghap, 21 tarik u Naitung, 1993, U Syiem Hima, u Lyngdoh Raid Mylliem bad ki Myntri ki la pdiang hun ia ka jingthoh jong u Bah Donbok ia kane ka kot ka long kaba shisha katkum ba ki ju leh niam ha Mawnariam, ha Loum Shyllong bad ha lewduh.

Haba nga la pule bniah bin pa bin, nga ruh kum uwei na kiba la ia bud dien lem shaphang ka leh niam jong ka Raid Mylliem, nga shem ba kane ka kot ka don la ka jong ka bynta ka ba kyntang ha kaba ki pateng ban wan kim dei shuh ban rieh tngen ha ka tharai ba kim tip shuh ia la ka jong ka tynrai namar ba ki la iasah khynnah khyllung. Kane ka kot ka long ruh kum ka jingkieng kaba pyniasnoh biang ia ka jingkiakynduh jong ka Mynnor, ka Mynta bad ka Lawei, ka ban nym pynsah

khynnah shuh ban shu ia kynnoh ba ki longshwa ki manshuwa
kim shym la buh jingthoh ia la ka jong ka tynrai.

U Rangbah Donbok T. Laloo da kaba thoh ia kane ka kot
na ka bynta ba ban iatip lem ka pateng ban wan, ula leh la
ka jong ka deiti, ym tang ban pynsah nam ia ka kyrteing jong
u Pa'yiern Laborious Manik S. Syiem, u Syiem-long-Syiem ka
Hima Myllem uba la dukhai naduh ba sdang haduh ban da
mih pyrthei kane ka kot kumba ka long mynta, pynban u
Rangbah Donbok T. Laloo ula pynnoh ruh ia u synniang na
ka bynta ka Dorbar Raid Myllem kaba la ju angnud la kham
slem ban shu pynmih noh da kum kane ka kot ka ban pynbatai
shai ia ki longdien ba kin iatip lem shaphang ka jingmut jong
ka "Leh Niam ha Mawnarian, ha Loum Shyllong bad ha
Iewduh."

Kum u briew uba ithuh bha ia u Rangbah Donbok T. Laloo
bad uba sngew tynnat ban pule ia ki kot-pule ba la thoh da
u, ngam lah khlem da iaroh ia u bad pynsyriem ia ka jinglong
jong u, kum kato ka Umpohliw kaba mih na la ka thymmei
kaba wat la ka buit briew ka pyrshang ban set katno-katno ruh,
ka tip hi la ka jong ka lynti nangno ban ksam haduh ban mih
blait shabar ba u khun bynriew un ioh ban mad ia ka
jingshngiam jong ka. Kumjuh ruh une u Rangbah uba la tur
ia ki rai-eh-rai-dam jong ki-khlaw ki btap bad shah ia ka lyer
u slap kiba long kum ki dieng pyngkiang ia ka lynti iaid jong
u, khlem riej da ka mynsiem shynrang ula leh bad iai leh ban
pyndep la ka jong ka deiti kaba U Trai Nongthaw Nongbuh
Ula bsut ia ka sap kyrpang ha u. Ki kam radbah kiba u Rangbah
Donbok T. Laloo ula pynlum pynlang bad buh ia kita da ki
jingthoh ha ki kot-pule khnang ba ki longdien mandien kin ia
tip lem ia la ka jong ka tynrai, ka long ka jingprat lynti ia ki
longdien man-dien ba kin nang iawad ia thoud lem sa maki
de, na kawei ka juk sha kiwei pat, bad ba kin lait na ka jingshah
pynkoh ha kiwei pat ki jaitbynriew, kiba ha ka jaka ban shah
batai ki pynbatai pynban. Kumban shu ai nuksa, "u bym dei
u Khasi te u dei u Dkhar," hynrei haba u pynbatai u pynkoh
pynban "U Kharlieh" lane "U Khariong," te haba la shoh la

ka tyndep, iano yn kynnoh shuh, dei satang ban ia kyndit bad
ia khie noh keiñ haba dang don ei kiba ia pynkyrsiew lem,
namar ba wat ka jingpynkyrsiew ruh ka don la ki jong ki akor,
kaba pynkyndit tip-briew ruh ka don bad kaba pynkieh-ruma
ruh ka don.

Kumban shu pynkynmaw, U Myllung Soso Tham ha Ki
symboloh ksiar jong ki sngi barim U Hynñiewtrep, ula ong:-

Jingshai ngi wad sawdong pyrtnei;
Jingshai ka Ri ngim tip eiei,-
Kumno hyndai ki Knii ki Kpa
Ki sain pyrtnei, ki seng hima

.....
Shaphang U Blei, ka Pap, ka Hok,
Kumne ki kren pharshi syllok

.....
Ha kper ki Khlur kiwei ki sah,
Kiwei ki ngam shapoh Lawbah.
"Ban kit ka Pap ban bah ryndang,
Hyndai na Krem Lamet Latang,
U ieng rangbah u Syiar," ki ong,
"Ban ap jutang U Blei na jrong:"
Ki seng ka Niam ba bat rukom

.....
Jingshai ba rieh-ba ngin dang lum,
Ka don kylleng ki Trep ki Skum:
Nangta ngin ioh jingtip ban shai,
Shaphang ki Sngi ba Rim Hyndai.
Jingshai ngi wad sawdong pyrtnei;
Jingshai ka Ri ngim khein eiei:
Kum kiwei pat ki sngi kin mih,
Jingshai barim baroh ngin tih:
U Thied u Phniang Jingshai ba im,
U suh shapoh ki Sngi ba Rim.

.....
To suit ki rong, Ko Khulom Ksiar,
I'u briew ba dum ban pynshai kdar.

Te kumta ruh shaphang u Rangbah Donbok T. Laloo, nga kum kynmaw ia ki jingpyrsad mynsiem jong u Rangbah S. Jenkin Duncan: "Ka Mynsiem ba Shyrang" ha ka "Duitara Ksiar" kaba u ong:-

"Wei la kut ka jingmut, kam neh ban shong khop;
Ba jinghun ka mynsiem, ka long ka jingjop."

Dated: Shillong,
Sngi Mawlong,
21 tarik Nailar, 1993.

B. Nishan Wahlang,
Secretary,
Ka Dorbar U Syiem Ka Hima
Myllem.

I.	Sumar la ki jong	1
II.	U Shu-Long	6
III.	Ka ĩewduh	10
IV.	Ka Dorbar Raid Myllem	14
V.	Ka leh niam Raid Myllem	15
VI.	Ka bynta ba nyngkong ka leh niam Raid Myllem. Sngi ĩew Nongkrem	18
VII.	Sngi ĩew Mawlong	28
VIII.	Sngi ĩew Rynghap	31
IX.	Sngi ĩew Shyllong Pamtiah bad Umni	40
X.	Ka bynta ba ar ka leh niam Raid Myllem	43

SUMAR LA KI JONG

Balei ka jaitbynriew u Hynñiewtrep Hynñiewskum ka jem rngiew, ka sah bieij sah kop, ka duk ka kyrduh, ka dap ram dap shah, ka jot ka pra, kam roi kam par bad ka kylla long mraw ha ki khwan myntoi, ki mynder shisngi bad ki nongwei sepsngi. Kawei na ki daw bah daw san ka long ba ngim treh shuh ban ñiew kor ñiew burom, ban kheiñ kor kheiñ kyntang ia ki Mawniam Mawbynna, ki 'Law niam Law kyntang, ki Ryngkew ki Basa, ka riti ka dustur bad ka niam ka rukom la jong. Lada ka jaitbynriew jong ngi ka sngew hieng khmut ia ka jong ki mynder shisngi, ne ia ka jong ki nongwei sepsngi, khlem pep kan kylla long ka mraw jong ki.

Ka long kaba sngewmong palat ban iohi ba la pom pynjot pathar ia ki 'law niam' law kyntang khlem kheiñ ne sngewsang shuh. Ka long ruh kaba sngewsih bad sngew lehraiñ hi suiñ ban iohi ba la pynlong jaka theh ñiut ia ki jaka ba don ki mawniam mawbynna. Pynban la ngi sngewmong ne sngewsih, yn leh kumno? Kine ki la jia, map Blei, ai kin ym jia shuh.

Lada kum ka jaitbynriew, ha la ki jong ki jong ki Shnong ki Raid bad ki Hima ngin kyndit bynriew noh bad ngin ia pynkhuid pynsuba, ngin pynbha ngin pynmiat, ngin ri ngin sumar biang ia la ki jong ki mawniam mawbynna, ki 'law niam' law kyntang kumba la leh da ki longshwa jong ngi, khlem artatien ka jait bynriew u Hynñiewtrep u Hynñiewskum kan ieng rasong sa shisien pat kum ha ki sngi ba la leit noh bad ngin pahuh pahai, ngin khiah krat khiah stang, ngin ia roi ia par bad khamtam eh, ngin lait na ka long mraw ha ki khwan myntoi, u mynder shisngi, u nongwei sepsngi... Haba ong yn pynkhuid pynsuba, yn pynbha pynmiat, yn ri yn sumar ia ki mawniam mawbynna, ki 'lawniam' law kyntang, ngim mut satia ban tuklar ia ka kylla niam kaba ngi laitluid shi met shi

met, hynrei la kumno kumno, kum ka jaitbynriew ngim dei ban leh beiñ leh toh met ne pynjot pynpra ia ki. Pynban ngi dei ban pynneh pynsah ia ki, lada ngi dang kwah ban paw ha khmat ka pyrthei kum ka jaitbynriew ba kyrpang. Lada don kano kano ka niam kaba hikai ia ngi ban isih ban leh beiñ bad pynjot pynpra ia ka Nongmei Nongpa ne ia i mei i pa, kata ka niam kam dei ka niam mane Blei, ka dei ka niam mane ksuid. Hato ki Mawniam Mawbynna, ki 'Law niam' Law kyntang, kim dei mo ka Nongmei Nongpa jong ka jait bynriew u Hynñiewtrep Hynñiewskum?

Ha kaba ia dei bad kitei ki mat ki jura ba la ia pur ia lir, ka Hima Myllem ha ka jingbtin bad ia ai mynsiem jong ki Syiem ki Kmie ha ryngkat ki Bakhraw ba sian ka Hima, ki la ai ha ngi ia ka nuksa ba bha tam ia kaba ki Shnong, ki Raid bad ki Hima ki dei ban ia pyrthuh bud mardor, lada ki mon shisha ban pynim la ka jong ka jaitbynriew.

Ia ki mawbynna ba bun ba ngi lap ha ĩewduh, khamtam kito kiba don ha khlieh ĩew. la thung bad pynieng ia ki da ka niam ka rukom. Katba ngi lah ban lum jingtip la thung bad pynieng ia kine ki maw ban kynmaw ia ka leh niam ĩewduh da ki Syiem bad ki Bakhraw jong ka Hima Myllem ha ki sngi ki por jong u Miet Syiem bad u Kyrshap Syiem ka Hima Shyllong. Uwei na pdeng kine ki maw shynrang ne Mawrynieng kumba ju ong ki Bhoi, u jrong palat ia ka 23 phut 9 inshi na sla khyndew. Kine ki mawbynna mawniam ki sakhi ia ka jingkhraw, ka bor ka iktiar bad ka jingiattyli ka Hima Shyllong ha kita ki por ha ryngkat bad la u Syiem u Kmie.

Haba u Mawbynna ba la thung pynieng ha syndah u maw duwan knia ka 'Lei-iaw' Lei-dwar ha jan basa tymbew u la kyllon noh, ki Bakhraw San kur Khatwei kur ha ki sngi ba dang long Lyngdoh Raid u Shiran Marbaniang, ki leit thlieh da uwei pat u maw na Myllem Marbaniang bad ki leit kit ia u sha ĩewduh ha basa tymbew. Hangta ki duwai ki phirat, ki suit ki shor kat kum ka niam ka dustur thung mawbynna bad ki sa sieh pynieng da u maw ba thymmai khnang ban biang ka

niam ka rukom kumba la buh la seng naduh mynbarim. U Shiran Lyngdoh Raid Mylliem u long Lyngdoh ha ka por ba long Syiem u Syiem Francis Syiem.

Sa kawei ka nuksa. Ha shwa jong ka snem 1990, ka jaka leh niam ha khlieh ĩewduh ka la kylla long ka jaka theh ĩiut ba jakhlia haduh bym sngewnud shuh ban batai. Ki Mawbynna maw shynrang ba jrong ki i lyngkot ba la tap u ĩiut u ĩier. Ha ka por ba ka Raid Mylliem ka leh niam ĩewduh, la shu pynkhuid malu mala tang na sla. Kane ka jingleh sang ĩa ka jaka kyntang jaka leh niam ka la pynjem rngiew shikatdei eh ĩa ki paid Hynĩiewtrep kiba im ja na ĩewduh kat haduh ba kiba bun na ki ki kylla duk, ki dap ram bad ki kylla long ki mraw ha ki khwan myntoi bad ki nongkhaii mynder.

Mynshwa ki mynder ki wan khaii ban pynheh, pynphuh pynphieng ia ka ĩew ka hat jong ngi ki trai muluk trai jaka, hynrei mynta ka la kylla khongpong. Balei ka leit jia haduh katne?

Ka daw tynrai ka dei ka jingleh sang ĩa ka jaka leh niam ha khlieh ĩewduh, namr la pynlong ĩa ka da ki nong ĩew, ym baroh, ka jaka theh ĩiut bad jaka leit rud.

Haba ngi bishar bad peit thuh ĩa ki jingjia ha ka jaitbynriew jong ngi na kawei ka por sha kawei pat, ngi shem ba ha man la ka sien ba ka jaitbynriew jong ngi ka don ha kano kano ka saw ka sian, u Blei Trai Kynrad na jrong na tbian U ju sei ĩa ki Khlawait, ki Akhia ba proh jingmut, ki rishot ki batympha, ki simpah ki simpieng, ki rang kynih ki rang phawar, ki ban ia ai reng, ki ban ia pashat jingmut, ki ban bah ban kyrshan, ki ban rwai ban phawar bad ki ban kyrsiew khlem riej, khnang ban pynlait ĩa la ka jong ka jaitbynriew na kum kata ka apot sepsngi.

Ha kine ki phew snem ba la leit, ka jaka leh niam ha ĩewduh, ryngkat ki khun ki hajar kiba im na ĩewduh, ki la don shisha ha ka saw ka sian. Hynrei donbok ba ka Hima Mylliem ka dang don ki Bakhraw ba sian, kiba dang long ki rang tip

briew tip Blei, tip hok tip sot, tip riti tip dustur, tip niam tip rukom, ba ki la jied bad thung Syiem ia u Laborious Manik S. Syiem ban long u Syiem ka Hima Myllem. Une u Syiem, la u dang samla, pynban u iohi ia ka jinglehsat ia katei ka jaka leh niam bakyntang ka Raid Myllem. Kumta u ia syllok bad la ki jong ki Myntri ki Bakhraw ka Hima ban ia wad lad wad lynti lang kumno ban pynkhuid noh ia ka, khnang ban eh biang ka rngiew ka bishi jong ki khun ki hajar.

Kumta ha ka 12/12/ 1990, ka Dorbar u Syiem ka Hima Myllem, lun pyllun pai lypai, ryngkat ryngkat bad la u Syiem u kmie ki sdang ban phah khat noh ia ka jaboh jabaiñ kaba la tap lup ia ka jaka leh niam. Ynda la khur la khat ia ka jaboh jabaiñ, la lap bad paw pynban sa ki maw kynthei. Kane ka jinglap ka la nang pynskuiñ shuh shuh ia u Syiem bad ki Bakhraw ka Hima ban nang ia tih ia pynkhuid haduh ba kin da lap lut ia baroh ki mawbynna, maw shynrang bad maw kynthei, kiba la kyllon la kheiñ bad shong kynriang khlem maw kjat.

Ynda la dep tih dep pynkhuid bad lap lut ia kiba la thung la buh la seng da ki Nongseng ia ka Iew ka Dwar, ka Dorbar jong u Syiem Myllem ha ryngkat ryngkat bad la u Syiem u kmie, ki pynshong bha ia ki maw shynrang bad maw kynthei katba kot la ka bor. Ym tang katta, ki la shna pynbha bad shna ia ka jaka ban shong ki khun ki hajar kiba kwah ban peit ban iohi ia ka leh niam Iewduh. Nalor kata, la ker bad sumar bha ia ka jaka leh niam khnang ba ki khwan myntoi, u dusmon u siar, u mynder na mihngi sepngi, na shatei shathie kin ym ioh lad shuh ban tap pud ne ban pynjakhlia mon kat ia ka jaka leh niam ba kyntang jong ka Raid Myllem ka Hima Myllem. Ban jin ba u Syiem bad ki Bakhraw ba sian jong ka Hima Myllem kin khapnap, khlem pynlut na ka pisa Hima, ngi ngeit ba haduh mynta, katei ka jaka leh niam kan jin da iai sma iwtung sma iwjit bad ka rngiew ka bishi jong kito kiba im ja na Iewduh kan iai noh iam rem bad kin iai dap ram dap shah bad iai long mraw shirta.

Ban pur sa khyndiat, ia ka kam ban nang pynbha pynitynnad shuh shuh ia ka jaka leh niam ha lewduh, la nang bteng shuh shuh ha ka snem 1992 bad mynta lada ngi leit peit ia ka jaka leh niam ha khlieh lewduh, ngin ym lah khlem sngew sarong, ba ka la i shongkhun shong Blei ha ka hok kat kum ka niam ka riti. Mynta ngim artatien shuh ba ki khun ki ksiew u Hynñiewtrep Hynnñiewskum kiba im ja na lewduh, kin kham bit kham biang ha baroh ki liang. Kin biang u khaw dapser u khaw dap mon, ka jaiñ ka nep, ka ksiar ka rupa bad baroh ka jingdonkam jong ki

U SHU-LONG

Baroh ngi ju bna ïa u Lum Shyllong. Ngì tip ba u long u lum uba jrong tam ha ka ri u Hynñiewtrep. U jrong kumba 1965 meter lane 6645 phut na sla duriaw. U Syiem Jor Manik Syiem ha ka kot jong u kaba u ai kyrteng "Ka Jingiathuh Khana-Pateng Shaphang ki Syiem jong ka Hima Mylliem (Naduh 1830 haduh 1960) kaba u la pynmih ha ka snem 1984, ha ka lynnong V, sla 21, u la thoh kumne:-

"U lum Shyllong uba long uba jrong tam eh ha ri Khasi bad Jaintia. Ha une u lum ki ngeit ba shong u Blei ki Khyndai Umdih Khyndai Umtong bad kita ki dei;

(1) Ka Umshyllong, (2) Ka Umjasai, (3) Ka Umshyrpi, (4) Ka Umdianglieng, (5) Ka Umkhen, (6) Ka Umngot, (7) Ka Umiew, (8) Ka Umtongsyiem (9) Ka Umjlieng."

Katei ka jingtip ka long kaba donkam, hynrei kumno u tei u lum u ïoh ïa ka kyrteng Lum Shyllong? Ka khana pateng ka long kumne:-

Baroh ngi tip ba hyndai ka shnong Bisei ka pawnam bha namar ka dei ka jaka ba shong ba sah ki Syiem Shyllong ha shwa ba kin kynriah sha Nongkseh-rim (Morshan). Ka shnong Bisei ka don sha ka liang sepngi na ka surok bah Mylliem 12 mer. Ka wah Umjlieng ka ïa kynduh bad ka wah Umiam Mawphlang ha kjat jong ka shnong Bisei. U Lum Shyllong ba pawnam jong ka ri u Hynñiewtrep u don sha ka liang mihngi lam shatei na ka shnong Bisei.

Hyndai ha Bisei la don kawei ka thei samla kaba i bieij dungngur. Ka kyrteng jong ka dei ka Lir, hynrei ki shnong ki sin ïa ka da ka Lirbieij bad ki leh ibeiñ ïa ka kum kaba bieij, namar kam sian kumba ïa sian lem ki para samla. Ha kawei

ka sngi, ki bahaiing jong ka Lir ki lyngngoh ngaiñ ban lap ba ka Lir ka la pun khun. Hynrei ynda ki kylli u ei u kpa jong ita i khyllung ba ka pun, ka Lir ka iathuh hok ka ong "Ngam tip."

Katei ka jubab ka la nang pynshisha shuh shuh ba ka Lir dei kaba khleh bieij bad ki nang leh ibeiñ shuh shuh kat haduh ba kam lah shah shuh, bad ka phet noh na Bisei bad leit shong ha Ryngngi Shyllong (Mylliem Rngi) Hangne ka shna la i trep bad ka sah tang marwei hi. Ka rep ka riang katba lah synei hajan la ka trep, namar ka la pohbah. Ynda dei la ka por, ka Lir ka kha iap da uwei u khyllung uba bha briew katta katta. Ka Lir ka pangnud, hynrei kam lah leh eiei. Kumta ha ka jingsngewsih ka tep ia uta u khyllung ha kper iing

Bun bun snem hadien katei ka jingjia, ka Lir ka la kylla myllen ha la ka jingim ba marwei. Hynrei kyndit kynsan ha kawei ka miet ynda la jan shai, ka Lir ka la kyndit tynggeh na ba ioh thiah da ka jingsawa jong ki wait ki mohkhiew ha kper iing jong ka. Kumta ka khie bad mih shabar ban peit. Hangta ka iohi bun phew ngut ki rangbah kiba ia puh ia daiñ ia ka kper jong ka bad uwei u samla ba bha briew kum u'nai-khatsaw-synia u batai kam ia ki.

Ka Lir ka leit sha uta u samla bad ka kyrpad ia u ban ym leh beiñ ia ka riew kynthai ba kum ma ka bad ka ong ba um dei ban knieh beiñ ia ka kper jong ka. Uta u samla u shu peit ieit ia ka bad da ka sur ba jemnud jai u kylli. "Mei, phim kynmaw shuh ia nga? nga dei uto u khyllung ba phi la tep ha kper jong phi." U pynshai. Ka Lir kam lah sngewthuh. "Phi kynmaw ba phi thung pathaw thung klong halor ka jaka ba phi tep ia nga?" U pynkynmaw. "Kine ki dei ki nong trei jong nga, nga la phah trei ia ki khnang ban pynsuk ia phi." U pynshai shuh shuh.

Ka Lir kam sngew lah ngeit, bad uta u samla u ithuh ba ka artatien, namar u tip ba ym shym la pun ia u kat kum ka aiñ mariang. Kumta u pynshai syndon u ong "Mei, nga dei

u SHU-LONG. Ngam don kpa." Marsyn ong ia kitei ki kyntien, ka jingshai rong simpyllieng ka thaba ia ka kper baroh kawei. "Mei, "bteng u samla. "Leit khot kyrkieh ia ki kni, ki mabah, marit baroh, ong ia ki ba kin ia wan kloï shane khnang ba ngan hikai ia ki kumno ki dei ban leh niam lada ki kwah ba ngan iarap ia ki ha kano kano ka por ba ki donkam ia ka jingiarap jong nga.

Ka Lir ka sngewthuh ba dei ka sap Blei bad ka mreah ban leit khot ia ki. Ynda ki wan, u SHU-LONG u hikai ia ki ban leh niam ha ka duwan jong u ha kliar lum. Dei naduh katei ka por ba ki sa khot kyrteng ia uta u lum da u Lum Shu-long bad suki hadien la kynnoh Lum Shyllong bad mynta la don ruh kiba spel dak Lum Shillong.

U Bah Henry D. Ropmay ha ka jigthoh jong u kaba mih ha ka Souvenir jong ka Shillong Centenary Celebration 1976, sla 60 A Legend of Shillong u pynkut kumne:-

"The name of that wonderful youth was U Shyllong (Shu-long), which means 'one who grows naturally, 'or' 'one who comes in existence by himself.' Ever since that time, the name Shyllong, or 'Shillong' as we spell it to-day, has been a great and awful name, a name to conjure with. The people of Mylliem when they went to meet U Shyllong, through their religious rites and sacrifices on the hill which bears his name, never dared turn their backs on the peak when they retired, but moved slowly and reverently backwards step by step, until it disappeared from view. And a phrase-' Khot Shyllong' is still current among the people of Shella and its adjoining areas, which means to call upon U Shyllong to succour them in times of great peril, pain, or misfortune."

Ha ka ktien Khasi ka long kumne:-

Ka kyrteng jong uta u samla ba phylla ka long u Shyllong (Shu-long) kaba mut 'Uba long hi' lane 'Uba wan long da lade hi.' Naduh katei ka por ka kyrteng Shyllong lane Shillong kumba ngi spel dak mynta ka kylla long ka kyrteng ba pawnam

bad kaba phieng, ka kyrteng kaba la pynkyntang. Ki nong Myllem haba ki leit ban ia shem ia u Shyllong lyngba ka leh niam bad ka kria ka khriam ha ka duwan kaba don ha kliar jong u lum uba ki nam ha ka kyrteng jong u (Lum SHU-LONG), kim ju nud ban leit phai da kaba phaidien ia ka duwan jong u, hynrei ki kynran da dien suki jai da kaba nguh burom ne leh riewblei shi jam pa shi jam da dien haduh ban da kyllep ka duwan jong u. Ka kyntien ba ngi ju ioh sngew 'Khot Shyllong ' ka dang kynrei bha ha pdeng ki nong Shella bad ki jaka ba markhap mar khum jong ka, ka kyntien ka mut ban khot ia U Shyllong ha ka por ba ki don ha ka jingma kaba khraw, ki jingpang lane ka sniew bok sniew nusip."

Dei naduh ka por ba u SHU-LONG u hikai kumno ban leh niam ha U, ba u Lyngdoh Raid, ka Lyngdoh-sad, ki San kur Khatwei kur ki sa nang sa tip ban pyndep ia ka niam ka rukom kaba dei ha u Blei SHU-LONG Syiem SHU-LONG, lane Blei Shyllong Syiem Shyllong. Katba lah ban lum jingtip, ka ting Lyngdoh-sad nyngkong ka don ka Ryngngi Shyllong (Myllem Rngi) bad hadien pat la pynkynriah noh sha Mawnarian, ka shnong kaba don ha jan Myllem Rngi, lane Ryngngi Shyllong.

KA ĬEWDUH


Katkum ki khana pateng, kawei na ki ĭew ba kham pawnam jong ki Syiem bad ki Bakhraw jong ka Hima Shyllong dei ka ĭew Rynghep kaba don ha Nongkseh-rim (Morshan). Hyndai ka Nongkseh-rim dei ka jaka shong jong ki Syiem Shyllong. Haduh mynta, dang don ki dak ki shin jong ka kharai ka palit, ki mawbynna, maw shynrang maw kynthei bad kiwei ki mawniam, Kumjuh ruh ngin dang ĭohi haduh mynta bun phew tylli ki mawbynna ha jaka ĭew Rynghep kaba don ha Nongkseh-rim hi, hajan Umsohlang. Ha kata ka por, ka leh niam ki Syiem bad ka leh niam ki Bakhraw ka dang long lang ha Nongkseh-rim bad ĭew Rynghep.

Hynrei na ki katto katne ki daw, la sngew dei ban pynkynriah noh ia ka ĭew sha kawei pat ka jaka kaba ki khot Mawiatan, phewse ki shem ba kata ka jaka kam long satia kaba biang ban long ĭew long hat. Kumta la hap ban pynkynriah noh sha ka jaka kaba ngi khot mynta ka ĭewduh (Shillong). Kumta ĭa ka leh niam ki Syiem bad ki Bakhraw la hap ban pynlong ha Nongkseh-rim bad ha ĭewduh.

U Dr. Homiwell Lyngdoh ha ka jingbatai jong u shaphang ki Syiem Shyllong ha ka kot jong u kaba u ai kyrteng "Ki Syiem Khasi bad Synteng" 3rd Edition, 1964 sla 90 u thoh kumne:-

"Ki syiem ki ju pyndep ia la ka niam hyndai shisien shisnem ha Nongkseh bad ha ĭewduh, kumba ki Syiem Nongkrem ki leh bad pyndep mynta ha Smit: tangba u dkhot uba ki noh ha kita ki por u long arphew-na ar bad mynta pat u long tang khyndai"

Nalor ka jingthoh u Dr. Homiwell Lyngdoh, ngi lap ruh sa kawei ka jingthoh jong u Bah H. Aiontis Roy Kharpuli kaba la mih ha ka Souvenir jong ka Shillong Centenary Celebration



U Mawbynna ba jrong palat 23'-9" ha ka jaka leh niam khlieh fawduh,
Shillong.

Photo by B.N. Wahlang



Ka ling Lyngdoh-sad ha khlieh fawduh, Shillong.



Ka leh niam 'Lei Longraid ha Mawnarian





Ka leh niam Suit-ñi Longraid





U Lyngdoh Raid bad ki Nong shim bynta ha ka leh niam ki klan ya ka wah
Pasir



U Lyngdoh Raid ryngkat ki San kur Khatwei kur ki noh kwai ha u
Mawsongkwai

1976, sla 17 kaba la thoh kumne:-

"According to traditions, in ages past lewduh was located at Nongkseh..... with the coronation of Syiem Shonrai, the people decided that the market be transferred to nearby places. A new market was established at MAWIATAN with due ceremonial observance. But it was found inconvenient.

"When Miet Singh was installed, the market was transferred to the present lewduh. The next Syiem, U Kyrshap, reinforced the shifting of the market to its present location."

Ha ka Khasi ka long kumne:-

Katkum ka jingiathuh pateng, ha ki por mynshwa ka ĩewduh ka don ha Nongkseh..... da ka jingkyntiew khet ia u Syiem Shonrai, ki paidbah ki la rai ban pynkynriah ia ka iew ha kano kano ka jaka ba jan. Kumta la sdang ia ka ĩew thymmai ha MAWIATAN da kaba pyndep ia ka niam ka rukom, hynrei la shem ba kam long.

Ynda long Syiem u Miet Sing Syiem, la pynkynriah ia ka iew sha ĩewduh, ka jaka ba long iew mynta. U Kyrshap Syiem uba la mih bteng ia u Miet Syiem u la nang pynkhlaĩn ia ka kam bad ka iew ka la neh ha (ĩewduh) ka jaka ba long iew mynta."

Ha ki por jong ka sorkar phareng, la don ka jingtohkit shaphang ka por bad ki nongthung nongseng ia ki mawbyinna kiba don ha kylleng ka ri u Hynñiewtrep, bad ha kaba ia dei bad ki mawbyinna kiba don ha ĩewduh, ka jubab kaba u G.E. Soames Esqr, ICS uba long u D.C. jong ka Khasi & Jaintia Hills u phah lyngba ka shithi jong u kaba 31 March 1922 sha u Commissioner Surma Valley & Hills Division ka long kumne:-

"During u Miet and Kyrshap Siem to commemorate the religious puja connected with the Shyllong market was started after the ĩew Rynghap at Nongkseh ceased to exist. They belong to the Siem and Elders of Myllem State."

Ha ka Khasi ka long kumne:-

“Ha ki por u Miet bad u Kyrshap Syiem ban buh jingkyrmaw ia ka leh niam ba ia dei bad ka Iewduh kaba la sdang ynda la duh noh ka Iew Rynghap ha Nongkseh. Ki dei ki Mawbynna jong ki Syiem bad ki Bakhraw ka Hima Mylliem.”

To ngin ia peit sa tang kawei ka jingthoh shaphang ka Iewduh bad kata ka long kat kumba paw na ka kot jong u Syiem Jor Manik Syiem kaba u ai kyrteng **“Ka Jingiathuh Khana-Pateng Shaphang ki Syiem jong ka Hima Mylliem”** (Naduh 1830 haduh 1960). Ist Edition 1984 Sla 26. U thoh kumne:-

“ka Iewduh kaba long ka iew kaba heh tam ha ki thain shatei lam mihngi ka India ka long ka iew kaba kongsan tam jong ka hima Mylliem. Kane ka iew ka ju long ka iew-niam mynba ki hima Mylliem bad Khyrim ki dang ia long kawei.”

Katkum ki Khanatang ba la iathuh pateng bad kat kumba paw na kitei ki jingthoh, ka shai kdar ba ka Iewduh ka dei ka Iew-niam kaba la ju leh bad pyndep da ki Bakhraw ka Hima. To ngin ia peit khyndiat balei mo ba u paid Hynñiewtrep Hynñiewskum u da leh niam bad seng ia ki Iew-niam.

Ki khun u Hynñiewtrep Hynñiewskum, ki ngeit ba dei u Blei Trai Kynrad na jrong na tbian, uba la buh la seng ia ka iew ka dwar na ka bynta ka bha ka miat ka long bynriew man bynriew, kaba long kawei na ki lad ki lynti ban pynbiang ia ki jingdonkam u khun bynriew. Nalor kata, u paid Hynñiewtrep u ngeit ba naduh ka por ba u dang ia sah lang bad ki Khyndai ha jrong, u Blei trai Kynrad hi u la seng ia ka iew ka dwar. Dei na kata ka daw ba wat ha ka por ba ki Hynñiewtrep Hynñiewskum ki la sah hangne ha sla pyrthei ruh, ki dang ia leit iew leit hat sha jrong lyngba ka jingkieng ksiar u Sohpetbneng bad kane ka paw lyngba ki 'tien duwai phirat jong ki rang kynih rang phawar ha ka por ba ki leh niam ia ka ' Lei iew

'Lei dwar mynba ki ong:-

*"Ba ka iëw ba dang kawei
Ba ka dwar ba dang kawei
Ba dang long ka iëw ka dwar
Ha jrong ha tbian
Ba dang leit ka lynti ka syngkien
Na jingkieng ksiar Sohpetbneng"*

Ha ka jaitbynriew u Hynñiewtrep, ka iëw ka dei ka jaka ba kyntang. Kam dei ka jaka ban ia *kamai da ka long spah, bam da ka longbriew*, kam dei ruh ka jaka ban thok ban shukor ne thombor lehbor. Ki laiphew mrad kim peiphang ia kane. Dei na kata ka daw ba ki atnud ia u khun bynriew bad ki seng la ka iëw ka hat, ka bym don nongrim ia ka sap mrad jong ki. Kumta ka iëw ki laiphew mrad ka kut ha ka luri lura, ka thombor ka lehbor, ka synshar bishar bym hok ia ki kup shiliang sem shiliang, ka leh buit sianti ban lait la i met. Kumta la duh la pra bad la long da ka kput ha u ingtyrkhong. Ka daw bah ka long ba ka iëw ki Laiphew mrad ka long ba kim don niam don dustur.

Ha kine ki juk ruh ngi shem ba la don teng ki bor khyllah kiba kwah ban thombor lehbor ia ki iëw ki hat khlem ka niam ka rukom. Kane ka long kaba mynsaw, khamtam ha kane ka juk kaba la bun kiba sngewthuh bakla ia ka *"Leh niam iëwduh"* bad kiwei kiwei ki iëw-niam kiba don hapoh ka bri u Hynñiewtrep. Ngim dei ban klet ba ka jingkylla niam ne pdiang ia ki niam thymmai, ki long tang ki jingkylla ne pdiang niam ba shimet shimet. Ki iëw-niam kim shym kylla niam ne pdiang niam thymmai, namar ki iëw-niam ki don la ki jong ki niam bad ki sang ban mushlia ia ka jong kiwei, khamtam eh da ka buit sianti ba pohdor tang ban ioh kamai da ka longspah bad bam pat da ka longbriew.

KA DORBAR RAID MYLLIEM

Ka leh niam Raid Mylliem kam lah ban long khlem da ai bor da ka dorbar Raid. Kumta man la ka snem ha ki taiew ba khatduh jong u bnai Kyllalyngkot, lane ha u bnai Rymphang, u Lyngdoh Raid Mylliem lem bad ki myntri San kur Khatwei kur ki ju lum ia ka dorbar Raid ha iew Mylliem-rim. Ka jingthmu ba kongsan jong katei ka dorbar Raid, ka long ban rai, la ki lah ne em ha kata ka snem ban pynlong ia ka Leh niam Raid.

Ha katei ka dorbar Raid, nador u San kur Khatwei kur, la don lang ruh baroh ki tymmen ki san bad ki 'riew khmat jong ka Raid. Ia ka dorbar Raid la ju pyniaid da u Lyngskor jait Sohtun, hynrei lada jia ba um poi dorbar na kano ma kano ka daw, u Lyngdoh Raid Mylliem un pyniaid ia ka. Ha katei ka dorbar ki ju da ia pyrkhat sani bha ia baroh ki jnit ki jnat shwa ban shim ia ka rai, namar kim lah ban Leh niam Raid shiteng shiliang. Wei la sdang ki dei ban da pyndep pura ia ka. Ha ki jingiatat ia pyni nia, lada jia ba ka dorbar kam sngew lah, kata ki rai ban ym pynlong satia ia ka Leh niam Raid ha kata ka snem. Lada jia pat ba ka dorbar ka sngew lah, kata ki rai ban pynlong bad ki aiti ha u Lyngdoh Raid Mylliem bad ki myntri San kur Khatwei kur ban pyndep ia ka Leh niam Raid.

Haba la ai bor da ka dorbar Raid, u Lyngdoh Raid Mylliem lem bad ki myntri San kur Khatwei kur, ki ia buh ia ka sngi ka ia ban pynlong ia ka Leh niam Raid bad ki ai jingtip sha baroh ki shnong kiba hap hapoh ka Raid Mylliem kata naduh Bisei haduh Bhoi lymbong khnang ba kin ia tip paidbah bad ban ia lum ia u synniang u byrhei.

KA LEH NIAM RAID MYLLIEM

Ka Leh niam Raid Mylliem lah ban pynbynta kyllum ha ki ar bynta. Ka bynta ba nyngkong dei ka Leh niam kaba ki leh ha ka duwan Lyngdoh-sad kaba don ha Mawnarian bad ha ka duwan Blei Shyllong Syiem Shyllong kaba don ha kliar jong u Lum Shyllong. Ki ju pynlong ia kane ka leh niam ha ki bnai pyrem bad ki ju sdang ha ka sngi iew Nongkrem bad pynkut ha ka sngi iew Umni. Ka bynta kaba ar pat dei ka leh niam iewduh ha iewduh Shillong, kaba ki ju pynlong ha u 'nai Thah thoh ('nai saw kba) shwa ka tlang. Kane ka neh tang shi sngi bad ki ju pynlong ia ka ha ka sngi iew Rynghep.

Kiba don hok ban pyndep ia ka Leh niam Raid kumba la buh la tang bad pynkhamti da ki longshwa man shwa ki dei tang ki San kur Khatwei kur. Kiwei pat kim don hok. Ki San kur Khatwei kur ki long kumne harum:-

Ki San kur

1. *U Lyngdoh Raid* uba dei na ka kur Marbaniang Mylliem. Une u long u nong pynbiang ia baroh ki jingdonkam kiba ia dei bad ka knia ka khriam, kum ki syiar, ki blang, ki sniang, ka 'laphieh, ka 'lasning, u khaw, u kpu, u rynsi, ka pliang rnong ban buh um, u klong ba la don iad-um, (u klong uba ki la thep jyndem bad pyndap da ka um) ka jyndem, u luta rnong ba la dap um, ka um, ka wait pom blang, u dieng ba la lit nep ban dung sniang, ki lama saw, ki dieng lyngkhot ban kynmaw ia ki khyndai dkhot bad kiwei kiwei ki jnit ki jnat katba donkam. Ia ka bom, ka tangmuri, ka kynshaw bad ar tylli ki ksing la ju ia pynbiang lang da u Lyngdoh Raid ryngkat ki San kur Khatwei kur.

2. *Ka Lyngdoh-sad*. Kane ka dei ban long ka pyrsa jong u Lyngdoh Raid. Lada jia bym don pyrsa, lah ban pynlong

Lyngdoh-sad da ka kynja kmie. Ym ju bit ban pynlong Lyngdoh-sad da ka hymmen ka para ne ka tnga jong u Lyngdoh Raid. Ka Lyngdoh-sad ka dei ka nong ap ka nong ri ia ka iing Lyngdoh-sad bad ka peit ka sumar ia baroh ki jingdonkam kiba ia dei bad ka kñia ka khriam ia kiba la pynbiang lypa da u Lyngdoh Raid. Dei ma ka ka ban sei ka ban aiti napoh iing Lyngdoh-sad ia baroh ki jingdonkam ha ka kñia ka khriam. Shwa ba ka Lyngdoh-sad kan aiti ka da nguh Blei, ka da duwai bad kyrkhu kyrdoh ia ki. ka rukom ai ruh ka long ba ka Lyngdoh-sad ka dei ban aiti tang ha u Lyngdoh Raid, lane lyngba u Lyngdoh Raid bad u Lyngdoh Raid pat un sa aiti kat ha kiba u dei ban ai.

3. *U Lyngskor* na ka kur Sohtun. Une u long u Nongsiang sla ha ka duwan shwa ban kñia bad u long ruh u Nongsuit nongshor ia ki khyndai tylli ki dieng lyngkhot ha Pungkyiad ban kynmaw ia ki khyndai dkhoh.

4. *U Myntri* na ka kur Nongkhlaw Rngi. Une u long u Nongkñia, u nong duwai nong phirat, u nong kynih nong phawar ha ka Leh niam Raid Mylliem.

5. *U Myntri Shutia Kynto*. Une u dei na ka kur Kurkalang. Ka kam jong u ka long ban kynto kynhot ban sdang ia ka niam ka rukom. U pynkynmaw ia ki nong ia shim bynta bad ki khua ki hajar ia kano kano ka kam kaba ki bit ban leh ne kaba kim bit ban leh. U pynbiang ruh ia ki sla bad u ai ha u Lyngskor Sohtun ban siang ha duwan. Ha ka kñia Suit-ñi Longraid, dei ma u ban dung ia u sniang.

6. *U Myntri Nongpom blang*. Une u dei na ka kur Kharkongngor. Ka kam jong u ka long ban ot ia ki syiar bad pom ia ki blang ynda la dep ka duwai phirat u Nongkñia.

Ki Myntri Khatwei kur

1. *U Nongbat blang*. Une u dei na ka kur Synteng Nongdhar. Ka kam jong u ka long ban bat ia u riphin ba la teh na ryndang blang shwa ban pom bad ban ia lam ia ki 'langkñia ha ki jaka kñia.

2. *Shiphew ngut ki Nong song kwai* bad nong ia rap lang ha ka Leh niam Raid. Uwei na man la ka kur bad kita ki kur ki long (1) Synteng Umwi (2) Kharmon (3) Kharrubon (4) Kharmawphlang (5) Mylliem Umlong (6) Kharlang (7) Lyngstieh (8) War Nongjiri (9) War Tyngah bad (10) Kharlukhi.

Namar ba dei tang ki San kur Khatwei kur kiba don hok ban pyndep ia ka Leh niam Raid, kiba don hok ban jied bad thung Lyngdoh Raid ruh dei tang ki San kur Khatwei kur. Kiwei ki bor khyllah kim don hok bad kim bit mushlia ia ka niam ka rukom. Ka rukom ba ki San kur Khatwei kur ki jied Lyngdoh Raid ka long ba ki ju jied tang na ka kpoh long Lyngdoh. Ym dei na kino kino ki kur Marbaniang.

Ia ka Lyngdoh-sad la ju jied bad thung hi u Lyngdoh Raid. Kiwei pat ki Myntri San kur Khatwei kur la ju jied hi da la ki jong ki jong ki kur.

Ha ka leh niam Raid, u Lyngskor ne ki Myntri San kur Khatwei kur, lada jia ba kim lah ban ia shim bynta na kano ma kano ka daw, ka kur jong u kan phah shim bynta da uwei pat uba dei na kata ka kur.

KA BYNTA BA NYNGKONG KA LEH NIAM RAID MYLLIEM

Ka bynta ba nyngkong ba u San kur Khatwei kur u pyndep ia ka Leh niam Raid, ka dei ha Mawnarian bad Lum Shyllong kaba ki ju leh ha ki bnai pyrem. Kumba ngi la iohi sha khmat, la ju sdang ia ka niam ka rukom ha ka sngi iew Nongkrem bad pynkut ha ka sngi iew Umni. Ha ki sngi kñia lai sngi lynter, kata ha ka sngi Nongkrem, Mawlong bad Rynghep, ym ju bit satia ban pynrung ia kano kano ka kynja doh ha iing Lyngdoh-sad lait na ka doh kaba ki kñia. Ka jingbatai lyngkot ia ka bynta ba nyngkong jong ka Leh niam Raid Myliem ka long kumne:-

Ka Sngi Iew Nongkrem

Ha ka step iew Nongkrem ki kñia '*Lei Longraid*' ban kyrpad kyrpon ia ka Blei Longraid ba kan iai ri iai sumar ia ki myntri San kur Khatwei kur, ia ki khun ki hajar bad ia baroh kiba shong ba sah hapoh ka Raid ka Hima, ba kin iai koit iai khiah krat, ba kin iai bit iai biang ha ka leit ka wan, ka kamai ka kajih, ka khaii ka pateng ha iew ha dwar, namar da don da ka hukum Blei hi ban long ka Raid ka Hima bad namar ba da don da ka hukum Blei, ka Raid ka Hima ka dei ban da bit da biang da puh da phieng ha baroh ki liang.

Kumta ha katei ka step, shwa ban sdang ia ka leh niam, ki kur Kurkalang kiba bam na ka khyndew Mawrashe ki ai ka pisa synñiang hynñiew piah ha u Lyngdoh Raid Mylliem. Baroh ki Myntri San kur Khatwei kur, ki 'riew khmat ka Raid, ki khun ki hajar bad ki lok ki jor najan bad na jngai, ki ia lum lang khruai ha lypung iing Lyngdoh-sad kaba don ha Mawnarian ban sdang ia ka leh niam Raid. Ki tiar ki tar kñia baroh kumba la kdew sha khmat la pynbiang lypa ha iing Lyngdoh-sad da

u Lyngdoh Raid.

Haba kñia 'Lei Longraid, ka syiar lam lynti dei da ka syiar kynthei kaba saw tlem, kaba dang lud bym pat kha pylleng bad ka blang pat dei da ka blang kynthei kaba lieh sada, kaba dang rit dang sotti. Hangne ngi dei ban kynmaw ba ha kino kino ki jingkñia, u paid Hynñiewtrep um ju pyndonkam da ki bym biang ka long shynrang long kynthei. U da kheiñ sang hi ruh ban pyndonkam da kiba la ruid, ne puid ne la shoh dap.

Ynda la biang ka por, u Shutia Kynto Kurkalang, u kynto kynthot ban sdang noh ia ka leh niam. Ia ki lama saw la sieh ha kliar ki siej kiba jrong. Ar tylli ki sieh ha iing Lyngdoh-sad. Kawei sha ka mon, kawei sha ka diang. Ia kawei pat ka lama saw la ju sieh ha syndah ka rynsan ba shong tem ki Duhalia.

Haba la kynto la kynthot u Shutia Kynto Kurkalang, ki Duhalia ki kiew noh ha la rynsan bad u Nongkhlaw uba dei u Nongkñia, u leit ha khmat ka iing Lyngdoh-sad ban shim ia ki tiar ki tar ba don kam ha ka kñia ka khriam. Ka Lyngdoh-sad ka sei ia ki na poh iing-sad, ka nguh Blei, ka kyrkhu bad ka aiti ia ki ha u Lyngdoh Raid. U Lyngdoh Raid u shim, u nguh Blei, u kyrkhu ia ki bad u ai ha u Nongkñia. U Nongkñia u shim bad leit rah ia ki sha ka duwan ba la kynton da u khyndew kaba don hangta hi ha khmat ka iing Lyngdoh-sad.

Kawei pa kawei ka jingdonkam kaba ki pynleit ha ka kñia ka khriam kaba ia dei bad ka Leh niam Raid, ka dei ban da don ne rung shwa hapoh ka iing Lyngdoh-sad ne iing-sad ki Lyngdoh. Ka rukom shong u Nongkñia ka long ba u phai khmat sha mihngi. Ka duwan ka don ha khmat jong u bad sha kamon don u Sohtun bad u Kurkalang. Sha ka diang pat don u Kharkongngor bad u Lyngdoh Raid.

Ynda la poi ki tiar ki tar, u Shutia Kynto Kurkalang u shim kawei ka 'laphieh bad u buh ha ka lynghoh kti la jong. Nangta da kawei pat ka kti u shim sa ia kawei ka 'lasning bad

u buh syrtap halor ka 'laphieh bad u ai ha u Lyngskor Sohtun uba dei u Nongsiang sla ba un siang halor duwan. U ïai leh kumne khyndai sien khyndai wat, namar dei ban siang khyndai sla, ban kynmaw ban pynbiang ïa u khyndai dkhot. Namar kata, lada ngi ñiew na ka mon sha ka diang ngin lap ba la buh ter ter khyndai sla ka 'laphieh bad khyndai sla ka 'lasning ba la tynrong halor ki 'laphieh.

Ïa u klong ba la don ïad-um ki buh ha khmat ka sla kaba don hapdeng, kata lada ngi ñiew na ka mon sha ka diang, lane na ka diang sha ka mon, u klong u don ha khmat ka sla kaba san. Kumta lada ngi peit ngin ïohi ba ha khmat u Nongkñia don ki khyndai sla bad ha khmat ka sla pdeng don u klong. Haba la dep siang sla bad buh ïa u klong, u Nongkñia u sot lang shisien sot ïa u khaw, u kpu, u rynsi bad u buh shisien buh ter ter halor kita ki sla ba la siang halor duwan. U Nongkñia u ïai leh kumne lai sien lai wat.

Haba la dep pynkhreh ïa ka duwan, u Nongkñia u leit shim ïa ka syiar na ïing Lyngdoh-sad. Ka Lyngdoh-sad ka shim napoh ïing Lyngdoh-sad, ka nguh Blei, ka kyrkhu kyrdoh bad ka aiti ha u Lyngdoh Raid. U Lyngdoh Raid ruh u shim u nguh Blei, u kyrkhu bad u ai ha u Nongkñia. U Nongkñia u shim ïa ka syiar bad u rah sha duwan. Nangta da kawei ka kti u bat ïa ka syiar bad da kawei pat ka kti u sot lang shisien sot ïa u khaw, u kpu, u rynsi bad u jyllud ïa ka syiar da uta u khaw, u kpu, u rynsi, na ka khlieh sha duh tdong. U sot bad jyllud kumne lai sien lai wat. Nangta u sdang ban duwai phirat, ban kynih ban phawar kumne:-

*Kane ho! la ïeng ka kynmaw ka kyndit
La ïeng ka nguh suba ka dem suba
Khlem don jingwit jingma
Ha khmat jong phi ka Blei Longraid
Ngi dem khrup ban sngap ma phi
Ïa ka nguh barit ka dem barit
Ha khmat ka jong phi*

Ba phin nang pynbiang keiñ ma phi
la ka nam kynthei ka nam shynrang
Ka ai lad ka ai lynti, ka lum ka kynshew
Ba phin ieng ka bud kyndong
Ba phin ieng ka sharai kyndong
Ban biang ka nam khiah krat
Ban biang ka nam khiah stang
Ha ryngkat ki San kur ki Khatwei kur
Shi Lyngdoh shi synniang
Na Bisei ha Bhoi Lymbong
Ha ryngkat ki khun ki hajar
Kiba don hapoh ka Raid hapoh ka Hima
Ban biang ryngkat ha ka leit ha ka wan
Ha ka khii ha ka kamai
Haba ki leit ha ka iew
Haba ki leit ha ka dwar
Ban biang ryngkat
Ha ka khai ha ka pateng

Sngap kyndong keiñ ma phi
Ko Ranghinong ko kit ryndang
Ko bah ryndang ka Khraw jutang
Ko ba ioh ka hukum
Naduh nyngkong ka sngi
Ba dang lung ka pyrthei
Ba dang jem ka pyrthei
Ba dang kah u ki-iup
Ba dang kah u ki-iañ
Ba dang kah u Diengiei
Ba dang kah u diengngan
Ba ka lew ba dang kawei
Ka dwar ba dang kawei
Ba dang long ka lew ka dwar
Ha jrong ha tbian
Ba dang leit ka lynti ka syngkien
Na jrong u Diengiei na jrong u diengngan

*Da la khylllem u Diengiei u diengngan
Bad la shai ka pyrthei
La sah ki bynrIEW ha jrong ha tbian
Kyndai la wan taiar ha ka Mei ka Nongseng
HynniEW iing HynniEW skum
HynniEW iing HynniEW trep
Da la shai ka pyrthei ba tang kawei
La ieng ma Phi ko Blei sa ka lum ka kynshew
Ka seng ka d.iwan ka dorbar bah ka dorbar Blei*

*Ha katai ka dorbar
La poi ryngkat ki simlari ki sim larai
Ki laiphew mrad ki laiphew mreng
Nangta ki shong khap maw ki shong khap dieng
Ki shong jrong ki shong tbian
La ieng keiñ ma Phi ko Blei
Ka thung ka nam longsan
Ia ki symbai long bynrIEW
La ieng keiñ ma Phi da ka kylli ka bishar
Ha katai ka seng ka dorbar bah ka dorbar Blei
La ong mano ba nud ban dkut u ryndang ha madan
Ban um ka snam ha khyndew ban jamin ia ki long bynrIEW
Ban wan rah ka shithi ka khuor
Ki long bynrIEW sha khinat jong Nga
Ba ioh ym biang ki long bynrIEW
Ha ka nam khiahkrat ha ka nam khiah stang
Ha ka nam kynthai ha ka nam shynrang*

*La kylli la bishar na ki simlari ki simlarai
Kiba her kiba par ki ong ngim lah
La kylli la bishar ia ka thie
Ka shong wah nuid ka shong wah tir
Ka shong 'wei iong ka shong wei ngir
Ka shong khap maw ka shong khap dieng
Ka shong ha jrong ka shong ha tbian
Ki ong ngim lah. La rai keiñ ki 30 mrad 30 mreng
Ba kin sah la ka liang ka bynta. Bad ki long bynrIEW*

La ka liang ka bynta.
Sngap keiñ sa phi
Ko Rangbinong ko kit ryndang
Ko bah ryndang ko khraw jutang
Kaba wan hiar wan ryngkoh ma Phi
Na jrong na tbian ha kane kawei
Ka mei ka Nongseng
Ba wan hiar wan ryngkoh ma Phi
Na jrong na tbian
Ba itynnad ma Phi ia u syntiew u skud
la u phniang na pdeng nangta ba phi lap
Ia ka miet ka iong ba shong ba sah ma Phi
Ha krem lamet ha krem latang

Da wan ma Phi thop kynthop
Ha pdeng ka lyngkhuit ka lymboit
Wan kit ryndang wan bah ryndang ma Phi
Ia ki symbai long bynriew ba Phi ong
Tang nga ko Blei nga nud
Ban dkut u ryndang ban um ka snam ha khyndew
Ban wan rah ma nga ia ka shithi
Ka khuor ka jong u bynriew
Ban wan ha khmat ka dorbar bah ka dorbar Blei
Ngam nud wan ko Blei hapdeng ka lyngkhuit ka lymboit
Da wan ia diang ma Phi
Ia katai kawei ka 'tien hok ka 'tien Blei

La ioh keiñ u symphiah uba biang u thuia uba biang
Ka jaiñ kup kaba biang ka jaiñ sem kaba biang
U thoh nuid uba biang u thoh tir uba biang
Katta keiñ ko Rangbinong ko kit ryndang
Ko bah ryndang ko khraw jutang
La biang keiñ katta. Haba la biang katta
Wan babha jylluiñ ha khmat u Blei ha khmat u briew
Jylluiñ ha ka dur babha
Haba ym biang, ieng ka thung ieng ka thoh
Ha khmat u Blei ha khmat u briew

*Ha tyrpeng u Blei ha tyrpeng u briew
Hei ho! Ioh phi ong nga tim sang nga hiew sang
Haba la biang katta. Wan babha jylluin
Ha khmat u Blei ha khmat u briew
Ha tyrpeng u Blei ha tyrpeng u briew*

Ynda la dep duwai phirat, shwa ban ot ia ka syiar u Nongkñia u pynsum pynsait ia ka syiar da kaba u wieh um ia ki kjat bad ka shyntur jong ka. Nangta u sot lang shisien sot ia u khaw, u kpu, u rynsi bad ka um bad u jyllum ia ka na khlieh haduh tdong. U ia leh kumne lai sien lai wait.

Ynda u Nongkñia u la dep ban leh ia kitei baroh, u Lyngdoh Raid u leit ha khmat ka duwan bad u shim ia ka wait pom blang na duwan. Nangta u sot lang shisien sot ia u khaw, u kpu, u rynsi bad ka um bad u kyllan ia ka wait baroh ar liang da uta u khaw, u kpu, u rynsi bad ka um kaba u la sot lang. U leh kumne lai sien lai wat. Ha khmat ka duwan ruh u nguh lai sien lai wat ha shwa ba un ai ia ka wait ha u Nongpom blang uba dei na ka kur Kharkongngor. Ynda la dep leh kumtei, u Nongpom blang u wan ha khmat u Lyngdoh Raid ban shim ia ka wait bad ynda la ia nguh mar kyliang, u Lyngdoh Raid u aiti ia ka wait pom blang ha u da kaba ong artad "Ha ryngkat u San kur u Khatwei kur."

Ynda la ioh ia ka wait, u Nongpom blang u nguh ia ka duwan lai sien lai wat bad u sa bat ia ka syiar na khlieh (ka syiar u bat hi u Nongkñia) bad u ot tbak na ryndang bad buh ia ka khlieh syiar halor duwan bad sa pynphai noh ia ka wait sha u Lyngdoh. U Nongkñia u pynjaw ia ka snam syiar halor ka duwan bad u klong. Nangta u sa ot bad piad ia ka jynshong syiar bad u sei shabar ia u rwieng ban peit ia ki dak ki shin, u briew u Blei. Hadien kata, u sa buh ia u rwieng halor ka sla kaba don ha pdeng, u da duwai phirat bad ia pan ia ka dak ka shin ban ia kdup ia piam u briew bad u Blei. Nangta u sa sympat khaw. Lada bha, u briew bad u Blei ki ia piam ia kdup bad kynrong joiñ na ka sla.

Ynda la dep khad syiar, u Nongkñia u shim na iing
 Lyngdoh-sad sa ia ka blang. Hangne ruh ka Lyngdoh-sad ka
 da duwai da kyrkhu shwa ban aiti ha u Lyngdoh Raid.U
 Lyngdoh Raid u leh kumjuh ha shwa ban aiti ha u Nongkñia.
 Ynda la ioh ia ka blang, u ialam sha duwan bad u law ia u
 riphin ba la teh na ryndang jong ka. Nangta u sot khaw, kpu
 rynsi bad jyllud ia ka blang thik kumba u leh ia ka syiar bad
 u sdang ban duwai phirat kumne:-

*Kane ho! sa ka nam sawti ka nam sawjat
 Ka nam ki-iup ka nam ki-iaif
 Ka nam long heh ka nam long san
 Ban buh ban bujai ha khmat jong phi
 Ko Blei longraid
 Ba phin nang bud nang sharai kyndong
 Ha ka nam khiah krat ka nam khiah stang
 Ka lum ka kynshew
 Ha ka nam rep nam riang ka khau ka pateng
 Lien byllien ha pdeng ka Raid ka Hima
 U San kur u Khatwei kur
 Shi Lyngdoh shi synniang
 Na Bisei ha Bhoi Lymbong
 Ban nang teng ruh ma phi
 Ka sharai kyndong ka bud kyndong
 Ka lum ka kynshew ka khih ka kainai
 Ka synshar ka bishar ha pdeng ka Raid ka Hima
 Ioh don u thombor u iuh bor u nong shum nong dusmon
 Na mihngi ha sepngi ka Raid ka Hima
 Katta keif. Wan ba bha jylluiñ
 Ha u tor ha kliar*

Ynda la dep ka duwai ka phirat ka kynih ka phawar, shwa
 ban pom ia ka blang, u jyllud khaw, kpu, rynsi bad ka um
 lai sien lai wat kumba u leh ia ka syiar. Hadien kata u sa aiti
 ia ka blang ha u Nongbat thri blang, uba dei na ka kur Synteng
 Nongdhar. Une u teh biang da u riphin na ryndang jong ka

blang bad u ĩalam ĩa ka ha khmat ka duwan ban pom da u Kharkongngor.

Ha kane ka sien ruh u Lyngdoh Raid u shim biang ĩa ka wait pom blang na khmat ka duwan. Ka rukom nguh rukom kyllan khaw, kpu, ryinsi bad ka um ka long kumjuh kumba u la leh mynshwa bad u sa ai ha u Nongpom blang da kaba ong artad. "Ha ryngkat u San kur u Khatwei kur"

U Nongpom blang u shim na u Lyngdoh Raid ĩa ka wait pom blang, u nguh ĩa ka duwan lai sien lai wat, kumba u leh ha shwa ban ot ĩa ka syiar bad u sa pom tang shisien pom tbuk na ryndang jong ka blang bad ka khlieh blang ka hap kynshait snam ha madan. ĩa ka snam blang ruh ki pynjaw halor duwan bad u klong bad ki buh ĩa ka khlieh halor duwan.

Mar ĩa hap ka wait halor ka ryndang blang, ir shit ka mynsiem u San kur Khatwei kur, ki khun ki hajar bad ki lok ki jor da ka jingkhynwin ba pynkyndeh mynsiem jong ka bom, ki ksing, ka tangmuri, ka kynshaw, ba tem ba put ki Duhalia nalor ka rynsan. Ka sur ba ki put ki tem dei ka mastieh niam, ka sur kaba ki Khyndai na jrong ka hiar ban mastieh kmen lang bad ngi ki Hynñiew ha tbain. Ka sur kaba ĩeng rangbah u briew bad u Blei u ap jutang. Katba ka snam blang ka nang kynshait saw haiñ ĩa ka madan, katta nang ih ka sur mastieh kaba pyntriem ĩa ki mynder bad ki tynneng mynder. Hynrei kaba pyneh rngiew bad pynĩaw mynsiem ban tur shaphrang ha ka jingĩaleh ban pynneh pynsah la ka niam ka riti ka dustur kumba la ai hok u Blei Trai Kynrad na jrong na tbian.

Katba ki Duhalia ki nang ĩa put ĩa tem shipor ar por, ki Nong song kwai nongĩarap lang ki shim ĩa ka blang, ki puid ĩa ka bad ki sei ĩa u tor shabar ban peit ĩa ki dak ki shin kat kum ka jingĩapan. Ban khuid ka snam ki ju wieh shuwa ĩa u tor ha um. Nangta ki pyrsad ba un siep bha bad ki sa leit pyni ha u Nongkñia ba un peit. Lada u tor u dap lyer bha bym don jingpei ne thoh dak eiei bad ka kliar jong u ka nep bha, kata ki khieñ ba ka kam ka bha. Hadein kata, ki Nongĩarap ki shim ĩa ki Khyndai Dkhot ban pynbiang hapoh ka niam.



Ka leh niam ha Pungkyiad





Ki siang sla ban pynkhreh ya ka duwan u 'Lei Shyllong Syiem Shyllong bad
ki lam lynti da u Syiar





U Nongkñia u sdang ka kynih ka phawar. Nangta u Lyngdoh Raid u sa shim na Duwan ãa ka wait pom blang.





U kur Kharkongngor u da nguh Ya ka Duwan shwa ban ot Ya u Syiar ne pom
Ya u Blang.





Marsyn dkut u ryndang Blang, ki shad mastieh bad kynkiw da ka jingkmn ba la pdiang
hun mynsiem u 'Lei Shyllong Syiem Shyllong bad ki nongiarap lang ki sa puid ia u
Blang.






U Nongġarap lang u pyrsad ġa u tor bad u leit pyni ha u
Nongkñia.





Ki pynbiang ía u Khyndai Dkhot bad ki sa suit sa shor





Duhalia na rynsan ki put ki tem sngewbha ban shad rhem mynsiem ki rang ki
thei samla





Lympung Mawnarian suhsieng 'er iwbiñ pyngngad ba shad hun sngur
mynsiem ki 'thet sottibad





Ka Nguh Lyngdoh mynba u Kesswell Marbaniang u long Lyngdoh Raid Mylliem bad i Kong Jngit Marbaniang i long Lyngdoh-sad



Ka Nguh Lyngdoh mynba la shimti ya ka kam Lyngdoh Raid da u Charles Marbaniang bad ya ka kam Lyngdoh-sad da i Kong Rita Ros Marbaniang.

Kata, ki ot khyndiat na (1) u klong (2) u dohnud (3) u tor (4) u khyllai (5) u lamjew (6) u lab (7) ka nier bah (8) ka nier lang (9) ka nierlong bad ki leit ai ha u Nongkñia.

U Nongkñia u pdiang ña kita ki dkhot bad u peit bniah la ki la biang ne em. Lada la biang u bat ña ki ha kawei ka kti bad da kawei pat ka kti u sot lang shisien sot ña u khaw, u kpu, u rynsi ka um bad u buh lang ña ki baroh halor kita ki Khyndai dkhot. Nangta u nguh u dem ña ka 'Lei Longraid bad sa buh lang ña kita baroh ha ka sla kaba don ha pdeng. Nangta u duwai phirat bad u suit u shor da u klong ba la don lypa ka ñad-um.

Ha kane ka sngi ym don jingkñia eiei shuh, lait sa tang ba kin ña shet ña tiew bad ña bam sngewbha katba ña kot lang.

KA SNGI ĪEW MAWLONG

Haka step kaba bud hadien ba ki la kñia 'Lei Longraid, kata ha ka step Īew Mawlong, ki ju pynlong pat sa ka kñia *Suit-ñi Longraid* da u sniang ba ïong synia. Īa une ruh ki kñia ha ka juh ka duwan ba ki kñia 'Lei Longraid. Ka rukom shim na ïing Lyngdoh-sad ïa ki jingdonkam na ka bynta ka kñia ka khriam, ka rukom pynkhreh ïa ka duwan, ka rukom siang sla, ka rukom shong kñia u Nongkñia bad ki Myntri San kur, ki Duhalia, bad kiwei kiwei ki riti leh niam ki long kumjuh kum haba kñia 'Lei Longraid. Ka jingïapher ka long ba ha kane ka kñia *Suit-ñi Longraid* kim pyndonkam shuh da ka syiar da ka blang, hynrei tang da u sniang shynrang uba ïong syñia.

La pynlong ïa ka kñia *Suit-ñi Longraid* ban kyrpad kyrpon ïa ki Ñibah Ñisan kiba long ki nongseng jong ka Raid. Ma ki haba ki seng ïa ka Raid ka Hima ki biang ka wait ka stieh, u khnam ka ryntieh bad ki ju pahara bha la u pud u sam. Ki da ap miet ap ïong ïoh don u dusmon u siar, u thombor leh bor. Mynta ba ki kñi Nongsuit nong shor, ki nong seng ka Raid ka Hima ki la don ha dwar u Blei, ym ju bit ban klet ne leh lyndet ïa ki. Kumta u Nongkñia u kyrpad kyrpon ïa ka jingïada ba kyrpang jong ki.

Ynda la dep pynbiang ïa ka duwan dupat nadong shadong, u Nongkñia u bat ïa u sniang bad u jyllud khaw, kpu, rynsi lai sien lai wat thik kumba u leh haba u kñia syiar kñia blang bad u sdang ban duwai phirat ban kynih phawar kumne:-

*Kane ho! la ïeng ka kynmaw la ïeng ka kyndit
La ïeng ka nguh suba ka dem suba
Sa ha khmat jong phi ka nam Long-ñi ka nam Long-kong
Sa ha khmat jong phi u Suit-ñi Longraid
Kane keiñ ka nam sawti ka nam sawjat*

*Ka nam ki-ŭp ka nam ki-iaifŭ ka nam Longsan
 Phi uba don la ka 'tieh ksiar la u' nam ksiar
 Koba don ma phi la ka wait la ka stieh
 Koba don ma phi la u siej dung la u siej piah
 Phi uba ap ia u pud ia u sam
 Sha mihngi sha sepngi sha kynriang sha pynieng
 Ba ioh don u nongtuh bor u nongthom bor
 Ha pdeng ka Raid ha pdeng ka Hima*

*Phin ia leh ma phi phin ia tur ma phi
 Phin kah ma phi phin da ma phi
 Ha ryngkat u San kur u Khatwei kur
 Ha ryngkat u Synniang barat u synniang ba heh
 Ban biang ka spah ka hajar
 Naduh ka sngi mynta ka step mynta
 Na Bisei ha Bhoi Lymbong
 Ha ryngkat u San kur u Khatwei kur
 Shi Lyngdoh shi synniang
 Ha ryngkat ha pdeng ka Raid ka Hima
 Katta keifŭ phi ka nam sawti ka nam sawjat
 Ka nam ki-ŭp ka nam ki-iaifŭ ka nam longsan
 Wan ba bha keifŭ jylluiŭ ha u klong
 Da ap ia ka nia ia ka jutang
 Da ia kren ia khana ha ka jingiapan
 Jong ngi u bynriew.*

Ynda la dep ka duwai ka phirat ka kynih ka phawar, u Nongkñaia u jyllud khaw, kpu, ryinsi, um, lai sein lai wat kumba u leh haba kñaia blang lei Longraid. Ynda dep u sa aiti ia u sniang ha ki nongiarap lang ban rah ia u ha khmat ka duwan. Nangta u Lyngdoh Raid u shim ia u dieng dung sniang ba la lit nep bha na khmat ka duwan. U da nguh da dem, da kyllan khaw, kpu, ryinsi, um, thik kumba u leh haba u shim ia ka wait pom blang bad u ai ha u Shutia Kynto Kurkalang ban dung ia u sniang.

U Shutia Kynto Kurkalang u shim ia u dieng dung sniang na u Lyngdoh Raid ha ka juh ka rukom kumba shim wait pom

blang u Kharkongngor bad ynda u la nguh la dem, u peit ba ki nongiarap lang kin pynthiah ia u sniang ha ka rukom kaba biang bad ynda ki la ia bat skhem bha, u buh ia u dieng dung sniang ha ka tohtit kadiang jong u sniang bad u shon tyngelh kynsan thrait bad ki ia bat sah kumta haduh ba u sniang um khih um kyrthat shuh.

Ha kane ka sien ruh, marsyn ia shon thrait ia u dieng dung sniang, ir shong shit biang ka iing Lyngdoh-sad bad ka lypung baroh kawei ka sawa da ka sur pynkyndeh mynsiem jong ka mastieh niam ba put ba tem shong shit ki Duhalia nalor rynsan.

Ynda u sniang um khih um kyrthat shuh, ki nongiarap ki puid ia u bad ki sei shabar ia u klongsnam bad ki leit ai ha u Nongkñia. U Nongkñia u pdiang ha kti, u duwai u phirat bad u buh ia u halor ka sla kaba don hapdeng duwan. Nangta u peit ia ka dak ka shin ba u ia pan. Lada u Klongsnam u dang khih bad peh tik tik kumba ring mynsiem, kata ka pyni ia ka dak kaba bha.

Hadien kata, ki nongiarap ki sa shim Khyndai Dkhot ban biang hapoh ka niam. Ka rukom shim dkhot ka long thik kumba ki shim na ka blang ba kñia 'Lei Longraid. Ynda la ioh baroh khyndai dkhot, ki leit ai ha u Nongkñia. U Nongkñia u pdiang ia kita ki Khyndai dkhot bad u peit bniah ba kin biang, namar lada bakla la poi sha ka mynsaw ne wat ka jingiap. Ynda la dep peit bniah, u Nongkñia u sa bat baroh khyndai dkhot ha kawei ka kti bad da kawei pat u sot lang shisien sot ia u khaw, u kpu, u rynsi, ka um bad u nguh u dem ha u Suit-ñi Longraid bad u sa buh lang ia kita halor ki khyndai dkhot bad sa buh lang baroh halor ka sla kaba don hapdeng bad u sa suit sa shor da u klong ba la thep jyndep bad pyndap um lypa shwa ban sdang ka kñia ka khriam. Ha kane ka sngi ruh vm don jingkñia eiei shuh, sa tang ban ia shet ia ka doh bad ia bam sngewbha katba ia kot.

KA SNGI İEW RYNGHEP

Ha ka İew Rynghep pat ki pynkhreh sa İa ka kñia ban nguh İa u Blei Shyllong Syiem Shyllong ha ka duwan kaba don ha kliar jong u Lum Shyllong. Ha kane ka jingkñia ki ju pyndonkam da u syiar ryngkuh uba saw tlem bad u blang sabob ('langsohmoh) uba lieh sada.

Ki kñia Blei Shyllong Syiem Shyllong ha u Blei Trai Kynrad, Uba long U Nongthaw Nongbuh, Uba long U nong shat mynsiem nongbuh mynsiem, ba Un ri Un sumar kyndong, Un phira miet step, İoh don u dusmon u siar u kdiap, uba thom da ka bor sympieh da ka snier, İoh don u leh bor u thom bor, İoh wan ka khlam ka ruk. Ki kyrpad kyrpon ruh ba u Blei Trai Kynrad Un kyndat Un weng İa ka sniew ka smeh bad Un kyrkhu kyrdoh İa ki San kur Khatwei kur, ki longsan mansan bad ki khun ki hajar ka Raid ka Hima ba kin biang ka jingkoit jingkhiah, ka long kynthei long shynrang, ka khaii ka pateng, ka spah ka phew kumba İa buh İa seng ma U na jrong na tbian.

Ha ka por step kumba khyndai baje antad, u Nongkñia u shim İa baroh ki jingdonkam kiba dei na ka bynta ka kñia ka khriam. Ka rukom aiti ka Lyngdoh-sad ha u Lyngdoh Raid bad na u Lyngdoh Raid ha u Nongkñia ka long kumjuh kum ha kaba kñia 'Lei Longraid.

Ynda İa biang ki tiar ki tar ba donkam, baroh lang jrup, ki San kur Khatwei kur, ki khun ki hajar, ki lok ki jor na jan bad na jngai, ki İa mih lang khruı ban leit kiew sha kliar lum Shyllong. Ka rukom İaid ka long ban lam khmat da u Lyngdoh Raid, bud ki myntri San kur Khatwei kur, bud ki Duhalia bad sa İa bud lut u paidbah paidsan kynthei bad shynrang. Marsyn sdang mih na İing Lyngdoh-sad, ki Duhalia ki tem ki put khlem sangeh. Ka sur ksing ba ki tem ki put dei ka Sing lynti.

Shwa ba kin mih na iing Lyngdoh-sad, ar ngut ki Nong song kwai nongiarap lang ki sei ia ka lama saw kaba ki la sieh hajan ka rynsan ki Duhalia bad kawei pat kaba ki la sieh ha syndah iing Lyngdoh-sad. Ia kine ki lama saw la rah lang sha kliar lum Shyllong. Ha iing Lyngdoh-sad ka sah sa tang kawei ka lama ban ap iing-sad. Ia u blang la tan da u Synteng Nongdhar, ia ki khyndai tylli ki dieng lyngkhot ba pyllon kat ka shynriahti bad jrong kumba shi tda, la rah da u Shutu kynto Kurkalang bad ia kiwei pat ki tiar ki tar ba donkam na ka bynta ka knia ka khriam, la kit hi da u Nongknia. Ha kane ka jingleit kiew sha kliar u Lum Shyllong, ka Lyngdoh-sad kam ju leit, ka ap ia ka iingsad.

Ka jingiaid lynti kaba da iphuh iphieng bad da i shongshit bha. Ka sur jong ka bom ka tangmuri ka sawa dap miar ia ki lum bad ki them ba pyngngad. Ka lyer ka kaweh ia ki lama saw ban pynshad hap sur bad ka bom ka ksing. Ki 'seh Khasi ba pyngngad hir hir ki sei la ki jingiwbihi ban nang ai bor shuh shuh bad ki nguh la ki kliar kumban khublei bad kyrkhu kyrdoh ban pynpaw ba ki ruh ki ia don bynta lang ban ia pyndep la ka niam ka rukom.

Ynda poi ha wah Pasir, u Lyngdoh Raid u thet kti bad nguh Blei. Nangta u klan ia ka wah sha shiliang bad u shong hajan u Mawsongkwai. Baroh kat kiba ia leit lang, ki ia shong thait ha kane ka jaka ban ia bam kwai ia dihi duma. Hangne ki Duhalia ruh ki shong thait ka put ka tem. Ynda la ia shong thait katto katne por, u Lyngdoh Raid, ki myntri San kur Khatwei kur, ki longsan mansan, ki khun ki hajar bad ki lok ki jor ki ia noh kwai ha u Mawsongkwai, namar dei ka rukom ban da song kwai ban ia pur ia lir ba don ka niam ia u 'Lei Shyllong. Ka rukom noh kwai ka long shiliang u kwai ba khlem khrud ne khoh snep bad shi sla u tympew khlem tah ne thoh shun.

Ynda la dep noh kwai, u Shutu Kynto Kurkalang u kynto kynhot ban ia kiew noh sha lum Shyllong. Hangta sdang biang ka tem ka put bad baroh lang ki bteng ia ka jingiaid lynti haduh

ban da poi ha Pungkyiad. Hangne ki sangeh biang ka put ka tem bad ki ia shong thait lang baroh. Ynda la dep ka ia bam kwai ka dih duma, u Shutia Kynto Kurkalang u kynto u kynhot biang ban sdang noh sa ka tang ka pung da ka iad-um ban kynmaw ia u Khyndai Dkhot hapoh ka niam. Kumta ki thep jyndem ha u klong bad pyndap da ka um.

Ynda la dep pynbiang, u Shutia Kynto Kurkalang u sei khyndai tylli ki dieng pyllon ba jrong kumba shi tda bad pyllon kat ka shynriahti bad u buh ia ki ha madan ter ter na ka mon sha ka diang baroh khyndai tylli. Ynda la pynbiang kumne, u Lyngskor Sohtun uba long u Nongsiang sla, u shim ia u klong ba la thep jyndem bad u ong "Kane ho! ka jingkynmaw ka jingkyndit ia ki Khyndai Dkhot ban bujai ha u 'Lei Shyllong Syiem Shyllong," bad u suit da uta u klong ia ka iad-um ha kita ki dieng baroh khyndai tylli. Ynda la dep suit ki lum lang ia kita ki dieng baroh khyndai tylli bad ki tynsat ha kyndong ka maw lyngknep kaba don hangta ha Pungkyiad.

Ynda la dep leh kumtei, u Shutia Kynto Kurkalang u kynto kynhot bad u mana ia baroh kat kiba ia leit kiew sha lum Shyllong ba kim bit ban rah sikret, biri, duma, kwai, ne kyiad ha duwan lum Shyllong. Nangta ki sa ia bteng biang ka put ka tem bad ki ia kiew haduh ban da poi ha kliar u Lum Shyllong.

Ynda la poi ha kliar u Lum Shyllong shwa ban rung hapoh duwan ki ju buh noh sharud ia ki duma, sikret, biri, kwai, kyiad bad ki law noh ia ki juti. Marsyn rung hapoh duwan ki sieh kawei ka lama ha ka jaka ba put ba tem ki Duhalia bad kawei pat hajan ka duwan ba la shna lypa da u maw lyngknep ba sawdong. Hangne ki shong thait shipor ar por bad pynkhreh ia ki tiar ki tar ba don kam na ka bynta ka knia ka khriam. Ynda la biang nadong shadong, u Shutia Kynto Kurkalang u kynto kynhot ban sdang noh ia ka knia ka khriam. Ka por ba ki ju knia Blei Shyllong Syiem Shyllong ka ju long ha ka por shiteng sngi eiei.

Ka rukom siang sla, ka rukom buh khaw, kpu, rynsi, klong, ka long kumjuh kum haba kñia 'Lei Longraid. Ka rukom shong u Nongkñia bad ki myntri San kur, ki Duhalia ruh ka long kumjuh. Ka jingiapher ha ka kñia Blei Shyllong Syiem Shyllong ka long ba u Nongkñia lem bad ki nongiarap ki shong phai khmat sha sepngi, katba ha baroh kiwei pat ki rukom kñia Leh niam Raid ki ju phai khmat sha mihngi. Lait nangta baroh ki rukom leh niam ki long kumjuh.

Ynda la dep pynkhreh ña ka duwan, u Nongkñia u lam lynti shwa da u syiar. Ka rukom bat ña u syiar, ka riti leh niam, ka rukom ot syiar, ka rukom peit ña u rwieng, u briew u Blei bad kiwei kiwei ki jingleh jingkam baroh ki long kumjuh kum haba kñia 'Lei Longraid, hynrei ka rukom duwai phirat, ka kynih ka phawar ka long kumne.

*Sngap keiñ ma phi kawei ka mei ka Nongseng
Kawei ka mei ka nongtap na jrong na tbian
Sngap keiñ ko Blei ko Trai Kynrad
Koba thaw ma phi koba buh ma phi
Ko shat mynsiem ko buh bynriew
Sngap keiñ ko Blei Shyllong ko Syiem Shyllong
Kane ho! la ñeng ka nguh suba ka dem suba
Ka kynmaw ka kyndit ha khmat jong phi
To sngew to sngap ma phi Blei Trai Kynrad
Ba phin nang ai ma phi ka buit ka bor
Ban biang ban bit ha ki San kur Khatwei kur
Ha pdeng ka Raid ka Hima
Na Bisei ha Bhoi Lymbong*

*Kane ho! ka nam ki-iup ka nam ki-iañ ka nam Longsan
Ba phin ñeng ma phi ka bud kyndong ka sharai kyndong
Ba phin ñeng ma phi ka ap miet ka ap step
Ban biang ka nam khiah krat ka nam khiah stang
Ban biang ka nam kynthei ka nam shynrang
Ha ryngkat ki San kur ki Khatwei kur
Shi-lyngdoh- shi-synñiang
Ha ryngkat ha pdeng ka Raid ha pdeng ka Hima*

Ban biang ryngkat ha ka khih ha ka kamai
 Ha ka spah ha ka hajar
 Ban biang ryngkat ha ka kshar thew mon ha ka rupa thaw mon
 Ba ioh don u nongüuh bor u nong thombor
 Ha pdeng ka Raid ha pdeng ka Hima
 Da u mihngi da u sepngi da u kynriang da u pynieng
 Ba ioh wan tur da ka lyoh da ka lypüt
 Ioh wan tur ei da ka khlam da ka mait
 Nïad ma phi weng ma phi ko Blei Shyllong ko Syiem
 Shyllong
 Ban biang ka nam khiah krat ka nam khiah stang
 Ha pdeng ka Raid ha pdeng ka Hima.

Sngap kyndong keiñ sa ma phi
 Ko Rangbinong ko kit ryndang
 Ko bah ryndang ko khraw jutang
 Koba ioh ka nam Longsan naduh mynnynghong ka sngi
 Ba dang lung ka pyrthei ba dang jem ka pyrthei
 Ba dang ia kren ryngkat ki simlari ki simlarai
 Ki laiphew mrad ki laiphew mreng
 Ba ka lew ba dang kawei ba ka dwar ba dang kawei
 Ba dang long ka lew ka dwar ha jrong ha thian
 Ba dang leit ka lynti ka syngkien
 Na jrong Diengiei na jrong diengngan

Da la khylllem u Diengiei diengngan
 La shai ka pyrthei ba tang kawei
 La sah ki bynrïew ha jrong ha thian
 Khyndai la wan taiar ha ka mei
 Ka Nongseng Hynñiew iing Hynñiewskum
 Hynñiew iing Hynñiewtrep.
 Na pdeng nangta la lum keiñ ma phi ko Blei
 Sa ka dorbar bah ka dorbar Blei.

Ha kane ka dorbar la poi lut ki simlari ki simlarai
 Ki laiphew mrad ki laiphew mreng
 La thung ma phi ko Blei ia ka nam Longsan
 Ia ki long bynrïew ha kane ka mei ka Nongseng

La ieng keiñ ma phi da ka kylli ka bishar
La ong mano ba nud ban dkut u ryndang ha madan
Ban um ka snam ha khyndew ban jamin ia ki long bynriew
Ha ka nam khiah krat ha ka nam khiah stang
Ha ka nam kynthei ha ka nam shynrang
Haba thoh ki long bynriew ia ka shithi ka khubor
Mano ba lah ban dkut u ryndang ha madan
Ban um ka snam ha khyndew ban wan rah ka shithi ka khubor
Ha khmat jong Nga.

Kumta la kylli la bishar
Ia ki simlari ki simlarai kiba her kiba par
Ki ong ngim lah
La kylli la bishar ia ki shong wah nuid ki shong wah tir
Ki shong 'wei iong ki shong 'wei ngir
Ki ong ngim lah
La kylli la bishar ia ki laiphew mrad ki laiphew mreng
Baroh kat kiba don Ki ong ngim lah
La rai keiñ ki laiphew mrad ki laiphew mreng
Ba kin sah la ka liang ka bynta bad
U long bynriew la ka liang ka bynta.
Sngap kyndong keiñ sa ma phi
Ko Rangbinong ko kit ryndang
Ko bah ryndang ko khraw jutang
Koba wan hiar wan ryngkoh ma phi
Na jrong na tbian sha kane kawei ka mei ka Nongseng
Ba wan ryngkoh ma phi na jrong na tbian
Ba itynnad ma phi ia u syntiew u skud ia u phniang
Ha kane ka wei ka mei ka Nongseng
Na pdeng nangta phi lap ha ka miet ha ka iong
Ba shong ba sah ma phi hangtai
Ha kreim lamet ha kreim latang

Da wan ma phi na kreim lamet na kreim latang
Wan kit ryndang wan bah ryndang ma phi
Ha pdeng ka lyngkhuit ha pdeng ka lymboit
La ong ma phi ban wan
Ha khmat ka dorbar bah dorbar Blei jong phi

Ngam nud wan ha pdeng ka lyngkhuit ka lymboit
Da wan ia diang keiñ ma phi
Ia katai kawei ka 'tien hok ka 'tien Blei

Phi ioh ka sopti kaba biang ka jaiñ kup kaba biang
U thoh nuid uba biang u thoh tir uba biang
U symphiah uba biang u syntai uba biang
Phi ong keiñ ma phi ba ngan ap miet ap step ma nga
Tang ban biang u kharw shikham mynmiet
U kharw shikham mynstep.
Haba la shai phar ha ka khyllie thiah ka jong phi
Ka khyllie shong ka jong phi, ka kynta ka jong phi
Ka minit ka jong phi haba la miet ngaiñ
Ka kynta ka jong phi ka minit ka jong phi
Ba pynshai ia ki long bynriew
Haba la biang keiñ katta, wan babha jylluin
Ha khmat u Blei ha khmat u briew, wan babha jylluin
Ha tyrpeng u Blei ha tyrpeng u briew
Ieng keiñ ka ia said ma phi
Ha tyngkong kaba shit ha tyngkong kaba shai
Ha jrong ha tbian ha ka khet ka mynshor

Hangne ruh u Nongpom blang u ot shwa ia u syiar bad
ki peit ia ki dak ki shin kumba ki knia ha duwan Lyngdoh-
sad ha Mawnarian. Nangta u Nongknia u bteng la ka kynih
ka phawar shwa ban pom ia u blang da kum kine ki kyntien:-

Ngi buh ngi bujai ia phi
Ko Blei Shyllong Syiem Shyllong
Ha ka sing ka duwai
Ba phin nang bud kyndong sharai kyndong
Ha ka nam khiah krat ha ka nam khiah stang
Ha pdeng u San kur u Khatwei kur
Shi Lyngdoh shi synñiang
Na Bisei ha Bhoi Lymbong katba ki don
Ban biang ruh ha ka synshar ka khadar
Ha pdeng ki khun ki hajar
Ba phin ieng ma phi ka sharai kyndong

*Ka ap miet ka ap step
Ba ioh don u thom bor u iuh bor
U kynriang u pynieng u mihngi u sepgi
U kharlieh u khariong*

*Ba phin ieng keifi ma phi
Ka ia tur ka ia leh ka ker ka da
Ia ki khun ki hajar ka Raid ka Hima
U San kur Khatwei kur
Na Bisei ha Bhoi Lymbong
Ban ieng ruh ma phi ha ka kynshew
Ia u synfiang ba rit synfiang ba heh
Ban biang ban bit ka ksiar thew mon rupa thew mon
Ki khun ki hajar ka Raid ka Hima
U San kur Khatwei kur
Ba ngi ieng ka nguh suba ka dem suba
Ha kane ka mei nongsing
Katba ki don pyllum
Katta keifi, wan ba bha jyllumi ha u tor
Ha kliar jong u tor.*

Ynda la dep ka kynih ka phawar, u Nongkñaia u jyllum khaw, kpu, ryinsi bad ka um kumba dei ka rukom. Ka rukom aiti ia u blang, ka rukom aiti ia ka wait pom blang, ka rukom pom ia u blang, ka rukom pynjaw snam ia ka duwan, ka rukom put rukom tem ki Duhalia, ka rukom peit ia ki dak ki shin, ka rukom shim dkhoh bad kiwei ki riti leh niam ki long thik kum haba kñaia 'lei Longraid. Hynrei don ka bor maian aiu re ha kane ka kñaia Blei Shyllong Syiem Shyllong bad kata ka long hamar ba dkut ka ryndang jong u blang bad hap ka khlieh ha madan, u Nongpom blang u mastieh shong shit ha ka sur mastieh niam ba put ba tem ia shad khyrwait met ki Duhalia. Baroh kat kiba ia don ki risa ki kynkiw shong shit da ka jingkmien kaba u thylliej briew um lah ban batai. Ki rang khatar bor ha la ka maiñ ba i dap shynrang, la u symphiah bad ki waitlam ba jrong ki shad mastieh ba la pdiang hun u Blei Shyllong Syiem Shyllong ia ka nguh ka dem sngur mynsiem jong ki trai Raid trai Hima.

İa ka khlieh jong u blang uba ki kñia Blei Shyllong Syiem Shyllong kim ju bam kumba ki leh İa ki khlieh jong ki blang ba ki kñia ha ki bynta bapler bapher ka Leh niam Raid, hynrei ki ieh noh halor ka duwan. Ka rukom ba ki buh İa ka khlieh halor duwan ka long ha kata ka rukom ba ka khmut blang ka phai shaphang shatei lam sepngi.

Ynda la dep ka noh dkhoh dep ka suit ka shor, ki nongiarap ki shet İa ka *Ja Khiah Krat*. Ka rukom shet İa kane ka ja ka long ba ki shet syrwa khlem mluh İa ka doh blang bad ki thep lang bad u khaw. Lait nangta ym bit ber ne khleh eiei. ynda la ih, İa ka *Ja Khiah Krat* khlieh khiew la taw shwa da u Lyngdoh Raid bad ki myntri San kur Khatwei kur. Hadien kata, ki sa theh halor shylliah bad İa sam İa ki khun ki hajar ban İa taw katba İa kot lang, khnang ban İa koit İa khiah krat khiah stang, ryngkat.

Ynda la dep İa bam İa ka *Ja Khiah Krat*, ki lum ki lang İa ki tiar ki tar bad khreh ban leit phai noh sha Mawnarian. İa ka lama saw ba sieh hajan ki Duhalia ki sei noh ban rah sha Mawnarian, hynrei İa kaba ki sieh hajan duwan ki ieh noh hangto. Shwa ban leit phai, ki Duhalia ki put ki tem biang İa ka sur mastieh niam bad baroh lang ki shad pyllun lai sien lai wat İa ka duwan ryngkat ka risa ka kynhoi kynkiw shar shi shar. Ha ka sien kaba lai ynda poi ha lynti ban mih, ki shad kynran da dien haduh ban da kyllep bym iohi shuh İa ka duwan bad ki sa phai khmat bad İa leit phai sha Mawnarian.

Ha lynti katba ki dang leit phai, ki Duhalia ki lai put İai tem khlem sangeh da ka sur sing lynti bad u paidbah u shad u risa, u kynhoi u kynkiw shar shi shar ba shlei ka mynsiem da ka jingkmien ba palat liam ba la pyndep İa ka niam ka rukom. Ynda poi ha wah Pasir, u Lyngdoh Raid, ki myntri San kur Khatwei kur bad kiwei kat kiba mon sngewbha ki bta la ka khmat bad ki sait kti sait kjat. Nangta ki sa leit phai noh sha İing Lyngdoh-sad Mawnarian ha ryngkat ka put ka tem shaid shi shaid.

KA SNGI ĪEW SHYLLONG. PAMTIAH BAD UMNI.

Ha kine ki lai sngi, ki pynlong ka shad kynthei shad shynrang ha ka lympung shad Mawnarian kaba don ha khmat iing Lyngdoh-sad. Ki Duhalia ki put ki tem nador ka ryndan. Ha syndah ka ryndan, ki sieh ia ka lama saw. Ki sur ksing ba ki ju shad ka long ka Dum dum, ka Nalai, ka Shad wait bad ka Mastieh. Ka riam ka beit jong ki nong shad kynthei bad shynrang ka long kum ha ka shad Weiking ha Shillong.

Ki sur ksing, ka bom, ka kynshaw ki sawa ban kyrsiew ia ki lum bad ki them ba pyngngad, ia ki phud um phud wah ba shngiam ban ia wan noh kjat kloī noh ha lympung shad. Ka Syiem Iyer ha la ka bhah, ka kit ka rong, ka kynting ka pynhiar ia ki sur ba bang ka 'tangmuri,, ban pynkyndeh ia ki dohnud ba lung jong ki theisotti bad ka mynsiem rangiawmon ki khatar bor ban ia beh dar dar sha lympung shad Mawnarian.

Ka Lympung shad Mawnarian ka jngai na ka huri hura, ka kaw kaw daw daw jong ka juk iapan— ka juk tynneng nongwei. Hangne kynjai ha ka jingbeh ki'er pyngngad halor ki lum bad ki them ba jyrngam ngin iohi ia ki theisotti-sotti te sottibad, ha la ki riam ki beit ba iphuh iphieng bad la ki pansngiat ksiar pansngiat rupa ha khlieh, ba ki ia shad kyrsih kjat hun mynsiem khlem jingsheptieng. Shi sur ka jingim, ka jingim u kur u kha ba dap khaw ser ba dap khaw mon. Shi sur ka niam ka rukom, ba nguh suba ba dem suba. Shi Lyngdoh shi synniang, shi tylli kawei ka jaitbynriew— ka jaitbynriew u Hynñiewtrep u Hynñiewskum. Ka riam ka beit ki theisotti ha lympung shad, ki sakhi ba ki kup ki phong shi ryñieng ka longbriew da ka hok ka sot. Ki rang khatar bor pat bad la ki waitlam ki mastieh khalalek khalalek arliang sorti. Shiliang ban

da lade, ka kur ka jait, shiliang pat ban da la ka Raid ka Hima.

Ki Duhalia ki put ki tem bad ïai put ïai tem, ki nongshad ruh ki shad bad ïai shad baroh lai sngi lynter. Ka thait ka jrem kam don ha ki,namar ki shympriahti ba lung ka Syiem Iyer ka ïai syrpuð syrpaï ïa ki, ka Mei ramew Syiem ramew ka ïai bah ïai kit ïa ki bad ka um ksiar um rupa ka ïai pynjah sliang ïa ki. Wat ka Syiem sngi kam ju kwah sep khlem doh ieit ïa ki. Katno ka itynnad. Katno ka phuh ka phieng, katno ka ishongkun don Blei. Shisha ym don bneng ka ban palat ban ïa kaba pyndep hok la ka niam ka rukom, ki riti ki dustur kumba la ai bad pynkham ti da u Blei Trai Kynrad Na jrong Na tbian.

Ha ka sngi Umni ki pynkut ïa ka shad ka kmen da ka Nguh Lyngdoh. Kata ynda la jan sep sngi ki myntri San kur Khatwei kur ryngkat ki khun ki hajar ki wan bad ïa lum lang ha khmat ka ïieng Lyngdoh-sad. U Lyngdoh Raid u shong ha khmat ka ïiingsad bad ka Lyngdoh-sad ka shong sha ka liang ka diang jong u Lyngdoh Raid. Baroh ar ngut ki shong phai khmat sha mihngi.

Ynda la ïa poi lut baroh ha khmat u Lyngdoh Raid, u Nongkñia na ka kur Nongkhlaw Rngi u nguh Lyngdoh bad u ong:-

*Kane keiñ, ngi ïeng ka nguh ngi ïeng ka dem
Ban biang ha ka nam khiah krat
Ban biang ha ka nam khiah stang
Ki San kur Khatwei kur
Shi Lyngdoh shi synñiang.
Ha khmat jong phi ka 'Lei Longraid
Ha khmat jong phi u Suit-ñi Longraid
Ha khmat jong phi u 'Lei Shyllong Syiem Shyllong.*

Ynda la dep nguh da kitei ki kyntien, u Lyngdoh Raid u khublei u kyrkhu kyrdoh ïa baroh ban ïa khiah krat khiah stang ryngkat. Ha dien kata, baroh ki myntri San kur Khatwei

kur ki ia rung lang hapoh iing Lyngdoh-sad ban ia kheĩn sbai.

Kumta ka bynta ba nyngkong jong ka Leh niam Raid ha Mawnarian bad lum Shyllong ka kut ka wai da ka jingkyrkhu u Blei Trai Kynrad ha pdeng ka jingkoit jingkhiah, ha pdeng ka sngewbha sngewmiat, ka phuh ka phieng, ka long kynthai long shynrang, ba dap ba biang ka Raid ka Hima, ba eh ka rngiew ka bishi bad ki San kur Khatwei kur ki pynkhreh ban pyndep sa ka bynta ba ar jong ka Leh niam Raid ha ľewduh Shillong.



U Lyngdoh Raid u nguh 'a ka Duwan ha khlieh 'lewduh shwa ban ai 'a ka wait pom blang ha u Kur Kharkongngor.



Ka leh niam ha ka 'Lei 'lew 'Lei Dwar ha ka Duwan kaba don ha basa tymphew, 'lewduh.

KA BYNTA BA AR KA LEH NIAM RAID MYLLIEM

Ka bynta ba ar jong ka leh niam Raid Mylliem, dei ka leh niam ha ĩewduh Shillong. Kumba ngi la iohi sha khmat, ki pynlong ĩa ka leh niam ĩewduh ha u 'nai Thah thoh ('nai saw kba) shwa ka tlang. Kane ka neh tang shi sngi bad ki pynlong ĩa ka ha ka sngi ĩew Rynghap. Ka jingbatai lyngkot ka long kumne:-

Ka jaka leh niam ba ha khlieh ĩewduh ka don ki Mawbynna kynthup ĩa ki maw shynrang maw kynthei, ka maw rynsan ki Duhalia, ka ĩing Lyngdoh-sad, ka duwan ba la kynton da ka khyndew ha khmat ne phyllaw ka ĩing Lyngdoh-sad bad kiwei ki jnit ki jnat ba pynphuh pynphieng ĩa ka niam ka rukom.

Shwa ka sngi leh niam, u Lyngdoh Raid, ki Myntri San kur Khatwei kur ki pynkhreh lypa baroh ki jingdonkam, thik kumba ki la pynkhreh ha ka leh niam ha ka duwan ka ĩing Lyngdoh-sad ha Mawnarian. Ka rukom kñia, ki riti leh niam, bad ki kam jong u Lyngdoh Raid, ka Lyngdoh-sad, u Lyngskor Sohtun-Nongsiang sla, u Myntri Nongkhlaw-Nongkñia, u Myntri Shutia Kynto Kurkalang, u Myntri Kharkongngor-Nongpom blang, u Synteng Nongdhar-Nongbat blang, ki Nongsong kwai nongiarap lang na ka kur Synteng Umwi, Kharmon, Kharrubon, Kharmawphlang, Mylliem Umlong, Kharlang, Lyngstieh, War Nongjri, War Tyngah bad Kharlukhi ka long kumjuh kum ha ka leh niam ha Mawnarian.

Ha ka step ĩew Rynghap, kaba dei ka sngi leh niam, baroh ki Myntri San kur Khatwei kur, ki longsan mansan, ki khun ki hajar lem bad ki lok ki jor kiba ieit kiba thoiñ ki ĩa lum lang khruai ha khlieh ĩewduh ban pyndep ĩa ka leh niam

Īewduh. Ynda dap kumba phra baje eiei mynstep bad la biang ka jingpynkhreh pynkhrum, u Shutia Kynto Kurkalang u kynto kynhot ban sdang noh ĩa ka kam. Kumta lai ngut na ki Nong song kwai nongiarap lang ki sieh ĩa ki lama saw, kawei sha ka liang ka mon jong ka ĩing Lyngdoh-sad, kawei pat sha ka liang kadiang bad ĩa kawei pat ki leit sieh hajan ka maw rynsan ki Duhalia.

Nangta u Myntri Synteng Nongdhar u leit shim na ĩing Lyngdoh-sad ĩa ka blang kynthei kaba lieh bad leit teh ĩa ka ha u Maw teh blang uba don ha jan basa khiew ranei, ki Duhalia ruh lem bad kito baroh kiba don bynta ha ka leh niam ki leit sha la ki jong ki jong ki jaka kat kum ka kam ba ki dei ban leh.

Ka leh niam ba nyngkong eh ba ki ju pyndep dei ka kñia 'Lang Īewduh. Ka jingmut jong kane ka long ba u Blei un ĩai bud ĩai ri bad ĩai sharai kyndong ĩa ki San kur Khatwei kur, ki longsan mansan bad ki khun ki hajar ka Raid ka Hima khnang ba kin khiah krat khiah stang, ban biang ka khañi ka pateng, ka die ka thied, u khaw dap ser dap mon, ka jaiñ kup jaiñ phong, ka spah ka hajar, ban nang pahuh ka lum ka kynshew ka longbriew mawbriew.

Ha ka leh niam 'Lang Īewduh, ki ju lam lynti shwa da u syiar shynrang uba saw tlem bad sa pynbud da u blang shynrang uba lieh. Ka rukom shim, rukom aiti na ĩing Lyngdoh-sad ĩa ki jingdonkam ha ka kñia ka khriam, ka rukom pynkhreh ĩa ka duwan, ka rukom shong ki nong leh niam, ka rukom siang sla, ka rukom ot syiar bad pom blang, ka rukom put rukom tem ki Duhalia, ka rukom peit ĩa ki dak ki shin, ka rukom shim ĩa ki Khyndai Dkhot, ka suit ka shor bad baroh ki jingleh jingkam, ki long kum ha ka leh niam ha Mawnarian, hynrei ka rukom duwai phirat bad ka kynih ka phawar ka long da kum kine ki kyntien:-

*Kane ho! la ĩeng ka kyninaw ka kyndit
Ka nguh suba ka dem suba*

Ha ka lew ha ka dwar
Ka nam sawti ka nam sawjat
Ha khmat jong phi u 'lang lew u lang dwar
Ba phin nang ieng ma phi
Ka bud kyndong ka sharai kyndong
Ban biang ka nam khiah krat ka nam khiah stang
Ha ryngkat ki San kur ki Khatwei kur
Ha ryngkat Shi-Lyngdoh shi-Synfiang
Ban biang ryngkat ka nam khiah krat ka nam khiah stang
Ha ryngkat ka Raid ka Hima

Nang kyntun ma phi
Ha ryngkat u khaw dap ser u khaw dap mon
Ha ryngkat ka jaiñ thup ka jaiñ kuli
Ha ryngkat ka shini ka mithai
Ha ryngkat kaba ki don ha ka die ka thied
Ha ka khaii ka pateng
Ba kin biang ki khun ki hajar
Ha ka spah ka hajar
Ha ka ksiar thew mon ha ka rupa thew mon
Nanglum nang kynshew ma phi
Ha ka khaii ka pateng
Ha ka spah ka hajar
Nangta nang lum nang kynshew ruh ma phi
Ha u synfiang barit u synfiang baheh
Ban biang ka nguh suba ka dem suba
Mian pa mian thop pa thop.

Katta keiñ ko ko Rangbinong ko kit ryndang
Ko bah ryndang ko khraw jutang
Katta wan babha jylluiñ
Ha khmat u Blei ha khmat u briew
jylluiñ da ka dur babha
Haba yin biang ieng ka thung ieng ka thoh
Ha khmat u Blei ha khmat u briew

Ynda la dep kynih phawar, ki sa ot pyndkut ia ka ryndang
jong u syiar bad ki sa peit ia ki dak ki shin katkum ka jingjapan.

Ynda la dep kñia ïa u syiar, u Nongkñia u bat sa ïa u blang bad u kynih phawar sa da kum kine ki kyntien:-

*Sa phi ka nam sawti ka nam sawjat
Ka nam ki-ïup ka nam ki-ïaiñ ka nam longsan
La bujai ryngkat ha khmat jong phi
Katta keiñ dkut u ryndang ha madan
Um ka snam ha kyndew, ïeng ka ïa said ka ïa thew
Ha khmat u thaw ryngkat u buh ryngkat
Ha khmat u Blei Trai Kynrad Nongthaw Nongbuh
Katta keiñ. Haba la biang katta
Wan ba bha jyllumiñ ha u tor ha kliar
Haba ym biang, ïeng ka thoh saw
ïeng ka thoh shin, ïeng ka bam saw
ïeng ka bam shin ban shai ma ngi u bynriew
Em ho! ïoh phi ong ba ngi tim sang ngi ñiew sang
Em. Wan ba bha jyllumiñ ha kliar
Ban shai ma ngi u bynriew.*

Ynda dep ka kynih ka phawar, u Nongkñia u sa jyllum khaw, kpu, ryinsi bad ka um kumba leh haba kñia 'Lei Longraid. Ka rukom aiti ïa u blang ha u Synteng Nongdhar, ka rukom shim rukom aiti ïa ka wait pom blang, ka rukom pom ïa u blang, ka rukom put rukom tem ki Duhalia, ka rukom shim ïa u Khyndai dkhoh, ka suit ka shor bad kiwei ki riti leh niam ki long kumjuh kumba ki leh haba kñia 'Lei Longraid.

Ynda la dep ka noh dkhoh ka suit ka shor ba dei ïa u 'Lang ñewduh, ki sdang pat sa ka leh niam ïa Ka Synshar Bishar, khnang ban biang ka synshar ka bishar hapoh ka Raid ka Hima, ïoh don ba thom bor leh bor na mihngi sepngi, na shatei shathie bad ki kyrpad kyrpon ïa ka Blei Synshar Bishar ba kan ïa leh ïa tur na ka bynta ka Raid ka Hima. Ha kaba ïa dei bad ka leh niam Ka Synshar Bishar, Ki ju pyndonkam da u syiar shynrang uba saw tlem ban lam lynti, bad pynbud sa da u blang shynrang uba lieh. Ki kyntien kiba u Nongkñia u kynih phawar ki long kumne:-

*Kane ho! ngi ieng ka nguh suba ka dem suba
 Bam biang ha ka synshar ha ka bishar
 Ha ka Raid ka Hima
 Ieng ma phi ka bud kyndong ka sharai kyndong
 Ha pdeng ka Raid ha pdeng ka Hima
 Ba ioh don u iuh bor u thom bor
 Na pdeng u mihngi u sepngi
 Na pdeng u kynriang na pdeng u pynieng
 Ha pdeng ka Raid ha pdeng ka Hima
 Ap miet ap sngi ma phi
 Ialeh ia tur ma phi
 Ha pdeng ka Raid ha pdeng ka Hima
 Ban biang ka synshar ban biang ka bishar
 Katta keiñ, wan ba bha jyllumiñ ha khmat u tor
 Ha khmat u kliar jyllumiñ ha ka dur ba bha
 Haba ym biang, ieng ka thoh saw ka thoh shin
 Ieng ka bam saw ka bam shin
 Ioh phi ong nga tim sang nga ñiew sang
 Em ho! wan ba bha jyllumiñ ha kliar.*

Ha dien ka duwai ka phirat, ka kynih ka phawar, baroh ki riti leh niam ki long thik kumba leh ia u Lang Iewduh.

Ynda la dep ka leh niam ba ia dei bad Ka Synshar Bishar, ki bteng sa ka leh niam ba ia dei bad U Suit-ñi Longraid, ban pynsngew pynsngap ia ki Nibah Nisan kiba long ki nong seng ia ka Raid ka Hima ioh don u kharlieh u khariong, u mihngi u sepngi, u shatei u shathie, uba thmu ban thom da ka bor sympieh da ka snier ha pdeng ka iew ha pdeng ka dwar. Kumta ki kyrpad kyrpon ia ki kumba ki don ka wait ka stieh, u khnam ka ryntieh, u siej dung u siej piah mynba ki seng ia ka Raid ka Hima, mynta ruh da ki juh ki tiar kin iada ia u pud u sam ka Raid ka Hima.

Ka leh niam ba ia dei bad u Suit-ñi Longraid ha lewduh Shillong, ka long da u sniang shynrang ba iong synia, kumjuh kum ha ka leh niam Suit-ñi Longraid ha Mawnarian. Ki kyntien duwai phirat ruh kim da ia pher than, wat la katta khnang

ban kham iä shai ha ka leh niam Suit-ñi Longraid İewduh, u
Nongkñia u pyndonkam da kum kine ki kyntien:-

*Kane ho! sa ha khmat jong phi
U Suit-ñi Longraid
Ngi ieng ka nguh suba ka dem suba
Ha khmat jong phi u Suit-ñi Longraid
Ka nam sawti ka nam sawjat
Ka nam ki-iup ka nam ki-iañ
Ba phin ieng ma phi
Ba ioh don u iuh bor u thombor
Ha pdeng ka İew ha pdeng ka dıwar
Ha pdeng ka Raid ha pdeng ka Hima
Phi koba ap iä u pud iä u sam
İoh don uba iuh bor ioh don uba thom bor
Da u mihngi da u sepngi
Da u kynriang da u pynieng
Da u kharlieh da u khariong*

*İeng ma phi koba don
La ka ryntieh ksiar la u 'nam ksiar
La ka wait ksiar ka wait rupa
İeng ma phi koba don la u siej dung
La u siej piah
Katta keñ. Haba la biang katta
Wan ba bha jylluiñ
İeng ka iä kren ieng ka iä khana
Ha u klong, da ap iä ka nia ka jutang
Ha ban da biang ma ngi u bynriew*

Hangne ruh, ynda la dep ka kynih ka phawar ka duwai
ka phirat, ka rukom aiti iä u sniang, ka rukom shim rukom
aiti iä u dieng dung sniang, ka rukom dung iä u sniang, ka
rukom put rukom tem ki Duhalia, ka rukom shim iä ki Khyndai
dkhot, ka suit ka shor bad kiwei ki riti leh niam ki long thik
kumba ki leh ha ka kñia Suit-ñi Longraid ha Mawnarian.

Ynda la dep shim ïa ki Khyndai Dkhot bad dep suit dep shor, ki sa khreh ban leit hiar sha basa tymphew na ka bynta ka leh niam ba ïa dei bad ka 'Lei ïew 'Lei Dwar. Kane ka long ha ka por shiteng sngi. Ki leh niam ha ka Blei ïew Blei Dwar, namar dei u Blei Trai Kynrad hi Uba la buh la seng ban don ka ïew ka dwar, ka 'Lei ïew 'Lei Dwar. Dei na kata ka daw ba ki sa ïoh ka nongrim ban kyrpad kyrpon ïa ka 'Lei ïew 'Lei dwar, ba kan bud kan sharai, khnang ban khiah krat khiah stang u San kur Khatwei kur Shi-Synñiang Shi-Lyngdoh, u khun u hajar ka Raid ka Hima, ban biang ka die ka thied, ka khaïi ka pateng, u khaw dap ser u khaw dap mon, ka jaiñ ka nep bad ka lum ka kynshew.

Ynda la biang ka por, u Shutia Kynto Kurkalang, u kynto kynhot ban ïa hiar noh sha basa tymphew bad ar ngut ki Nong song kwai nongiarap lang ki phut ïa ki lama saw na ka rynsan ki Duhalia bad ïa kiwei pat na khap ïing ka Lyngdoh-sad. Ki rah ïa kine ki lama sha jrong bad ki khreh ban hiar sha basa tymphew.

Kiwei pat ki jingdonkam na ka bynta ka kñia ka khrian la shim bad aiti na ïing Lyngdoh-sad ha ka juh ka rukom kum haba ki shim na ïing Lyngdoh-sad Mawnarian, mynba ki leit sha Lum Shyllong. Ka rukom ïaid bad ka put ka tem ki Duhalia ruh ka long hi kumjuh. Kaba ia pher khyndiat ka long ba ia ka blang kim pynmih shuh na ïing Lyngdoh-sad kum haba ki leit ban kñia ha u Blei Shyllong Syiem Shyllong, hynrei u Synteng Nongdhar u leit shim ïa ka na u Maw teh blang, namar u la dep teh lypa mynstep ha shwa ban sdang ka leh niam 'Lang ïewduh. Ynda la biang nadong shadong ki ia mih bad hiar lang jrup sha basa tymphew ha ryngkat ka ksing ka lama, ka put ka tem kaba pynlyngngoh ïa ki nong shong ïew nong wan ïew ki bym pat ju ïohi ne bna ïa kum kane ka leh niam ba phuh ba phieng jong ka Raid Myliem.

Ynda la ïa poi ha basa tymphew, ki sieh kawei ka lama saw ha jan ka duwan kñia bad ia kawei pat ki sieh hajan ka

jaka ba don ki Duhalia bad ynda la dep pynbiang ia ki jingdonkam, u Shutia Kynto Kurkalang u kynto kynhot ban sdang noh sa ia ka leh niam ba ia dei bad ka 'Lei iew 'Lei dwar.

Hangne ruh ka rukom shong ki nong leh niam, ka rukom pynkhreh ia ka duwan, ka rukom siang sla, ka rukom pynieng ia u klong, ka rukom ot syiar, rukom pom blang, ka rukom put rukom tem ki Duhalia, ka rukom peit ia ki dak ki shin,ka rukom shim ia u Khyndai Dkhot, ka suit ka shor bad kiwei kiwei ki riti leh niam ki long hi kumjuh kum haba leh niam 'Lang iewduh, tangba ha ka leh niam ba ia dei bad ka 'Lei iew 'Lei Dwar, ki ju lam lynti shwa da kawei ka syiar kynthei kaba saw bad sa pynbud sa da kawei ka blang kynthei kaba lieh. Ki kyntien duwai phirat kiba u Nongkñia u kynih u phawar ha ka 'Lei iew 'Lei Dwar ki long kumne:-

*Sngap ko Blei ko Trai Kynrad
Koba seng ma phi koba tup ma phi
Ia kawei ka mei ka Nongseng
Kawei ka mei ka nongtap
Koba la buh la seng lypa ma phi
Ia ka Blei iew ka Blei dwar
Kane ho! la ieng ka nguh suba ka dem suba
Ha khmat jong phi ka Blei iew ka Blei dwar
Ba phin ieng ka bud kyndong ka sharai kyndong
Ban biang ka nam khiah krat ka nam khih stang
Ha ryngkat ki San kur Khatwei kur
Shi-lyngdoh- shi-synñiang
Ban biang ha ka die ban biang ha ka thied
Ban biang ka khaii ban biang ka pateng
Ban nang heh ka iew ban nang heh ka dwar
Ha pdeng ka Blei iew ha pdeng ka Blei dwar
Ha pdeng ka Raid ha pdeng ka Hima
Nang lum ma phi nang kynshew ma phi
Nang kyntun ma phi nang barot ma phi
Ban biang u khaw dap mon u khaw dap ser*

Ban biang ka jaiñ thup ka jaiñ kuli
Ban biang ka shini ka mithai
Ha ryngkat ka khiih ka kamai ka khaii ka pateng
Katba ki don ha ka lew ha ka dwar
Katta keiñ la biang jyllumiñ wan ba bha jyllumiñ
Ha khmat u Blei ha khmat u briew
Katta keiñ wan ba bha jyllumiñ
Phi ka nam sawti ka nam sawjat
Ka nam ki-iup ka nam ki-iañ ka nam longsan
Ha u tor jyllumiñ da ka jingbha ha kliar
Ban shai ma ngi u bynriew.

Ynda la dep noh dkhot dep suit dep shor bad dep ka niam ka rukom, ki sdang sa ka shad kynthei shad shynrang kumba ki shad ha Mawnarian ha ka sur ksing Dum dum, ka Nalai, ka shad wait, ka Mastieh bad pynwai ia ka shad ka kmen da kaba ia leit kiew lang khruai sha khlieh lewduh, Ha ba ki leit phai sha khlieh lewduh, ki ju sei bad rah lang ia ka lama saw kaba la sieh ha jan ka jaka ba don ki Duhalia. Ia ka lama ba la sieh hajan duwan, ki ju ieh noh hangto hi. Haba leit phai, ki Duhalia ki ju put ju tem shong shit lynti lynti haduh ban da poi ha khmat ka iing Lyngdoh-sad na ka bynta la leh niam Nguh Lyngdoh.

Ynda la poi lang baroh, u Lyngdoh Raid bad ka Lyngdoh-sad ki shong ka khmat iing Lyngdoh-sad da kaba phai khmat sha mihngi, ka rukom shong ka long kumjuh kum ha ka Nguh Lyngdoh ha Mawnarian. Nangta u Myntri Nongkhlaw uba dei u Nongkñia u nguh Lyngdoh da kaba ong kumne:-

Kane keiñ ngi ieng ka nguh
Ngì ieng ka dem
Ban biang ha ka nam khiah krat
Ka nam khiah stang
Ha ryngkat u San kur u Khatwei kur
Ha ryngkat shi-Lyngdoh Shi-Synñiang
Ha khmat jong phi

*Ka 'Lei ųew ka 'Lei Dwar
Ha khmat jong phi
U Ņi Longraid u Suit-Ņi Longraid
Ha khmat jong phi u Thirni Longraid*


Nangta u Lyngdoh Raid u ieng bad ai khublei kylliang
Ĳa ki baroh ban Ĳa khiah krat khiah stang ryngkat. Haden kata
ki sa Ĳa bam Ĳa dih sngewbha ha thanad khlieh ųewduh.

Da kumne keiŅ para kur para kha, ki lok ki jor bad kiba
ieit ba thoiŅ, la pynwai Ĳa ka leh niam ųewduh ha pdeng ka
suk ka saiŅ, ka khiah krat khiah stang, ka kmen ka sngewbha,
ba nang thum nang kynthup, nang kit nang bah u Blei Trai
Kynrad na jrong na tbian ha ka Hok ka Shikyntien. Mynta u
briew u la pynkhreh kat kum ka hok Blei bad u Blei un sa
pynbiang kat kum ka pynkhreh hok ka jong u briew.


Ka Hima Mylliem ka la ai ha phi Ĳa ka Hyndai kaba sboh,
namar kumba ong u myllung Soso Tham "U symbai uba hap
ha ka jaka maw khlem la ka Hyndai, u shoh sam thiah tang
shit ka sngi." Ka sah ha nga ha phi, la ngin long ka jaka maw
ne ngin long ka Hyndai. Ai ba ka sngi kan sei Ĳa ki soh ki
syntiew, kan pynshai bad ai jingsyaid Ĳa ngi. *Jar uba pyrshang
ban tip bad sngew thuh Ĳa la ka jong ka nongrim, u kup bad phong
Ĳa lade da ka jaiŅ syaid kaba pher na kiwei pat ki jaiŅ.*

KHUBLEI

I E W D U H (BARA BAZAR) EXISTING LAYOUT : 1993 NOT TO SCALE



SPECTRUM audio visual



Donbok T. Laloo

Ka jingwad shitom jong u Bah Donbok T Laloo ban lum ban lang bad buh noh ha ka jingthoh shaphang ki Mawbyinna, U Shulong bad Kalewduh ka long ka jingai-er kaba khraw, ym tang ia ka Dorbar U Syiem Ka Hima Myllem hynrei ruh ia ki Khun ki Hajar pateng la pateng ba kin kham tip bha ia ka saih pyrkhat u Mynnor

L.S. Syiem,
Syiem of Myllem,
Myllem Syiemship

U Rangbah Donbok T Laloo da kaba thoh ia kane ka kot na ka hynta ba ban ratup lem ka pateng ban wan, ula leh ia ka jong ka deiti, ban pynbatai shai ia ki longdien ba kin ratup lem shaphang ka jingmut jong ka "Leh Niam ha Mawnarian, ha Loum Shyllong bad ha lewduh "

B. Nishan Wahlang,
Secretary,
Ka Dorbar U Syiem Ka Hima
Myllem